

摘藻堂四庫全書薈要

經部

欽定四庫全書薈要

經部

左傳注疏卷十六

七

詳校官原任侍講臣王燕緒




欽定四庫全書薈要卷一百三十二

經部

春秋左傳注疏卷十六

起僖公二十九年盡三十三年

晉杜氏注 唐陸德明音義 孔穎達疏

 十有九年春介葛盧來注介東夷國也在城陽黔
陬葛盧介君名也不稱朝不見公且不能行朝禮雖

不見公國賓禮之故書音義

介音界國名黔巨廉反又音琴陬子侯反又側留反

公至自圍許注無傳

夏六月會王人晉人宋人齊人陳人蔡人秦人盟于翟

泉注翟泉今洛陽城內大倉西南池水也魯侯諱盟天

子大夫諸侯大夫又違禮盟公侯王子虎違禮下盟故

不言公會又皆稱人音義

翟直歷反大倉音泰

疏

正義曰傳曰卿

禮卿不會公侯唯言諸侯之卿會魯君罪耳不言罪魯侯與子虎知其亦有罪者襄二十六年公會晉人鄭良霄宋人曹人于澶淵彼為趙武敵公貶之稱人而文不沒公此沒公不書明公別有罪五年公及齊侯宋公云云會王世子于首止王世子不盟也九年公會宰周公云云于葵丘宰周公不盟也往年踐土之會王子虎盟諸侯于王庭宣七年黑壤之會王叔桓公臨之王之公卿皆不與諸侯共盟則知諸侯不合盟王臣王臣不合與於盟今王子虎亦貶稱人知魯侯諱盟天子大夫故沒公不書也王子虎違禮下盟故貶稱人

秋大雨電音義

雨于付反傳同電蒲學反

冬介葛盧來

傳二十九年春介葛盧來朝舍于昌衍之上注魯縣

東南有昌平城音義

衍以善反

公在會饋之芻米禮也注

嫌公行不當致饋故曰禮也音義

饋其媿反芻初俱反

疏

正義曰周

禮掌客天子待諸侯之禮上公饗餼九牢饗五牢餼四牢車禾視死牢牢十車則禾五十車車米視生牢牢十車則米四十車侯伯饗餼七牢禾四十車米三十車子男饗餼五牢禾三十車米二十車芻薪皆倍禾也聘禮卿饗餼五牢禾米與子男同其附庸執帛與公之孤同則饗餼亦五牢禾三十車米二十車芻

薪倍禾則此饋之芻米芻六十車米二十車

○夏公會王子虎晉狐偃宋

公孫固齊國歸父陳轅濤塗秦小子憖盟于翟泉尋

踐土之盟且謀伐鄭也注經書蔡人而傳無名氏即

微者秦小子憖在蔡下者若宋向戌之後會音義

音轅

袁濤音桃憖魚

疏

正義曰晉侯受命鄭伯傳王踐土與溫二會咸在鄭無叛晉之狀而

此會謀伐鄭者文公昔嘗過鄭鄭不禮焉城濮戰前鄭復如楚雖以楚敗之後畏威來會晉侯以大義受

之內實懷恨此會鄭人不至必有背晉之心故謀伐之也晉語城濮戰下稱文公誅觀狀以伐鄭及其陴

鄭人以名實行成公不許得叔詹將亨而舍之左傳無伐鄭之事蓋溫會以後已嘗伐鄭鄭至今未服故

此會謀伐明年遂與秦圍之傳曰且貳於楚也鄭自知負晉故有二心也注正義曰經若貶卿稱人傳則言其名氏若傳無名氏則本是微人此經書蔡人而傳無名氏此是實蔡之微者秦是大國小子慙名見於傳而在蔡微者之後若宋向戌之後會也襄二十六年公會晉人鄭良霄宋人曹人于澶淵傳曰趙武不書尊公也向戌不書後也鄭先宋不失所也宋是大國常在鄭先向戌既以會公貶又以後至退其班使在鄭下此小子慙既以會公貶又退之在蔡下若彼宋向戌之後會也然向戌後會傳為發之經書良霄以駁向戌之後今小子慙既是後會傳不為發又不書蔡人之名以駁之者但秦辟陋西戎未同中國蔡人又蔡之微者不合書名故傳不發之經不貶責也公孫固序在齊上者蓋為大司馬尊於歸父歸父雖執齊政不廢身非上卿如管仲之類猶文十七年陳公孫寧襄二十七年陳孔與皆序在衛下杜云非

上卿即此類也卿不書罪之也注晉侯始霸翼戴天子諸侯

輯睦王室無虞而王子虎下盟列國以瀆大典諸侯

大夫上敵公侯虧禮傷教故貶諸大夫諱公與盟音

義

輯音集又七入反瀆徒木反上時掌反又如字與音預

在禮卿不會公侯會

伯子男可也注大國之卿當小國之君故可以會伯

子男諸卿之見貶亦兼有此闕故傳重發之音義直重

用疏正義曰昭二十三年傳叔孫婁曰列國之卿當反小國之君固周制也是其可以會伯子男也諸

卿見貶兼有此闕謂諸卿既上盟天子大夫又上敵公侯故云兼案杜上注經云諸侯大夫違禮盟公侯

又注傳云諸侯大夫上敵公侯則是不唯責諸侯大夫上敵公侯不責上盟天子之使而言兼有此闕者以魯君上盟天子之使已諱而不書則諸侯之臣罪在可悉故傳云卿不書罪之畧言其事故杜經傳二注唯言敵公侯不云盟王使以其可知故也劉炫以為直責其敵公侯不責其盟王使以規杜氏必如劉義則是君盟王使乃為有罪臣盟王使翻無貶責便是君臣易位尊卑失序聖人垂訓豈若是乎 ○秋

大雨雹為災也 ○冬介葛盧來以其未見公故復來

朝禮之加燕好注燕燕禮也好好貨也一歲再來故

加之音義

復扶又反好呼報反下同

介葛盧聞牛鳴曰是生三犧

皆用之矣其音云問之而信注傳言人聽或通鳥獸

之情音義

犧許宜反

疏

正義曰周禮夷隸掌與鳥言貉隸掌與獸言鄭司農云夷狄之人或

曉鳥獸之言鄭玄云夷隸征東夷所獲貉隸征東北夷所獲然則介葛盧是東夷之國其土俗有知者故

介葛盧

曉之

經三十年春王正月

夏狄侵齊

秋衛殺其大夫元咺及公子瑕注咺見殺稱名者訟君

求直又先歸立公子瑕非國人所與罪之也瑕立經年

未會諸侯故不稱君疏

正義曰咺既稱名故知以訟君立瑕為咺之罪狀春秋之世諸

侯雖篡弑而立已列於會雖復見弑即成為君齊商人蔡侯班之屬是也瑕立雖已經年未會諸侯故不稱君既不成君即與元咺同為國討之辭元咺先死故稱及也瑕若成君當據周敞治厘為文書曰衛弑其君瑕

衛侯鄭歸于衛注魯為之請故從諸侯納之例例在成

十八年音義

為于偽反

晉人秦人圍鄭注晉軍函陵秦軍汜南各使微者圍鄭

故稱人音義

函音咸汜音凡傳同

介人侵蕭注無傳

冬天王使宰周公來聘注周公天子三公兼冢宰也音

義

兼如字又經念反

公子遂如京師遂如晉注如京師報宰周

公

傳三十年春晉人侵鄭以觀其可攻與否狄間晉之

有鄭虞也音義

間間廁之間

夏狄侵齊注齊晉與國○晉

侯使醫衍酖衛侯注衍醫名晉侯實怨衛侯欲殺而

罪不及死故使醫因治疾而加酖毒音義

衍以善反酖音鴆

疏

正義曰周禮大司馬以九伐之法正邦國賊殺其親則正之鄭玄云正之者執而治其罪王霸記曰

正殺之也春秋僖二十八年晉人執衛侯歸之于京師坐殺其弟叔武如鄭彼言則衛侯合死而云罪不

及死者衛侯之心疑叔武耳前驅歎夫卜君意而殺之非衛侯命殺也公知其無罪枕股而哭又命殺歎夫是則殺非公意也故不至死若然則是衛侯無罪而往年衛侯與元咺訟衛侯不勝殺士榮則鍼莊子者用讒疑賢弟渝盟先期入是衛侯之罪也罪不合死而晉侯心怨欲得殺之故使醫因治疾而加酖毒若不治疾不得使醫故知因治疾也魯語云晉人執衛成公歸之于周使醫酖之不死醫亦不誅臧文仲言于僖公曰夫衛君殆無罪矣今晉侯酖衛侯而不死亦不討其使者諱而惡殺之也是罪不合死之事也

甯俞貨醫使薄其酖不死注甯俞視衛侯衣食故得知之公為之請納玉於王與晉侯皆十穀王許之

注雙玉曰穀公本與衛同好故為之請音義

公為于偽反注

同穀音角好呼報反

秋乃釋衛侯○衛侯使賂周欵治厯曰苟

能納我吾使爾為卿注恐元咺距已故賂周治音義

欵市專反治音也厯音覲又音謹人名也漢書音義云古勤字也鄭氏音勤

周治殺元咺

及子適子儀注子儀瑕母弟不書殺賤也音義

適丁歷反

公入祀先君周治既服將命注服卿服將入廟受命

疏正義曰言祀先君而服將命知其將入廟也必入廟者祭統云古者明君爵有德而祿有功必賜爵

祿於大廟示不敢專也命臣必在廟而王制云爵人於朝者朝上詢於衆人位定然後入廟受命今世受

官猶然

周欵先入及門遇疾而死治厯辭卿注見周欵

死而懼○九月甲午晉侯秦伯圍鄭以其無禮於晉

注文公亡過鄭鄭不禮之音義

過古
禾反

且貳於楚也晉

軍函陵秦軍汜南注北東汜也在滎陽中牟縣疏

正義

曰劉炫云二十四年王出適鄭處於汜注云鄭南汜也釋例土地名僖二十四年汜下云此南汜也周王出居于汜楚伐鄭師于汜襄城縣南汜城是也此年汜下云此東汜也秦軍汜南晉伐鄭師于汜滎陽中牟縣南汜澤是也杜考校既精當不徒爾尋討傳文未見杜意佚之狐言於鄭伯曰

國危矣若使燭之武見秦君師必退注佚之狐燭之

武皆鄭大夫音義

佚音逸

公從之辭曰臣之壯也猶不

如人今老矣無能為也已公曰吾不能早用子今急而求子是寡人之過也然鄭亡子亦有不利焉許之

夜縋而出注縋縣城而下音義

縋縣音玄 支偽反

見秦伯曰

秦晉圍鄭鄭既知亡矣若亡鄭而有益於君敢以煩執事注執事亦謂秦越國以鄙遠君知其難也注設

得鄭以為秦邊邑則越晉而難保焉用亡鄭以倍鄰

注倍益也音義

馬於虔反下焉取之同倍蒲回反

鄰之厚君之薄也

若舍鄭以為東道主行李之往來共其乏困注行李

使人音義

舍音捨又如字共音恭本亦作供使所吏反

疏

正義曰襄八年傳云一介行李

杜云行李行人也昭十三年傳云行理之命杜云行理使人李理字異為注則同都不解理字周語行理以節逆之賈逵云理吏也小行人也孔晁注國語其本亦作李字注云行李行人之官也然則兩字通用本多作理訓之為吏故為行人使人也君亦無所害且君嘗為晉君賜

矣許君焦瑕朝濟而夕設版焉君之所知也注晉君

謂惠公也焦瑕晉河外五城之二邑朝濟河而夕設

版築以距秦言背秦之速音義

朝如字注同版音反背音佩

夫晉

何厭之有既東封鄭又欲肆其西封注封疆也肆由

也音義

厭於鹽反
疆古良反

若不闕秦將焉取之疏

正義曰沈
云不闕秦

家更何處取之言有心取秦先謀
取鄭言滅秦以將利晉益大疆土

闕秦以利晉唯君

圖之秦伯說與鄭人盟使杞子逢孫楊孫戍之乃還

注三子秦大夫反為鄭守音義

說音悅為
于偽反

子犯請擊

之公曰不可微人之力不及此注請擊秦也夫人

謂秦穆公音義

夫音扶
注同

因人之力而敝之不仁失其

所與不知以亂易整不武注秦晉和整而還相攻更

為亂也音義

知音
智

吾其還也亦去之○初鄭公子蘭

出奔晉注蘭鄭穆公從於晉侯伐鄭請無與圍鄭許

之使待命于東注晉東界音義

預與音

鄭石甲父侯宣

多逆以為太子以求成于晉晉人許之注二子鄭大

夫言穆公所以立○冬王使周公閱來聘饗有昌歠

白黑形鹽注昌歠昌蒲菹白熬稻黑熬黍形鹽鹽形

象虎音義

閱音悅歠在感反菹莊居反熬稻五刀反

疏

正義曰昌歠饗之所設必是蔓豆之

實周禮醢人朝事之豆其實有昌本麋藿鄭玄云昌本昌蒲根切之四寸為菹彼昌本可以為菹知此昌歠即是昌蒲菹也齊有郇歠魯有公甫歠其音為觸說文云歠盛氣怒也從欠蜀聲此昌歠之音相傳為

在感反不知其字與彼為同為異徧檢書傳昌蒲之草無此別名未知其所由也此云白黑下云嘉穀穀之白黑唯稻黍為然下云
鹽虎形知其形象虎也 辭曰國君文足昭也武可

畏也則有備物之饗以象其德薦五味羞嘉穀鹽虎形注嘉穀熬稻黍也以象其文也鹽虎形以象武也

以獻其功吾何以堪之疏

正義曰周禮掌客王巡守百官從者所過之國共其

積膳三公眡上公之禮卿眡侯伯之禮大夫眡子男之禮宰周公是天子三公其主國待之當尊於國君但周公自謙不敢當比國君耳既云備物之饗以象其德及說備物之下即云以獻其功功德互見之耳獻其功者獻謂呈見旌表之也備設以象德薦獻以見功故象獻分配為文
○東門襄仲

將聘于周遂初聘于晉注公既命襄仲聘周未行故

曰將又命自周聘晉故曰遂自入春秋魯始聘晉故

曰初䟽

正義曰經書實行之事傳說將命之初故云命之將聘于周未行又命之遂聘于晉令其

從周即去更不迴也賈服不曉傳意解為先聘晉後聘周故杜詳說之

經三十有一年春取濟西田注晉分曹田以賜魯故不

繫曹不用師徒故曰取䟽

正義曰濟西之田實是曹地晉文分以賜魯故不繫於曹

不繫晉者晉本意賜諸侯不為已有故亦不繫晉也昭四年傳例曰凡克邑不用師徒曰取取田取邑義亦同也

公子遂如晉

夏四月四卜郊不從乃免牲注龜曰卜不從不吉也卜

郊不吉故免牲免猶縱也疏

正義曰龜曰卜曲禮文也洪範稽疑云龜從筮從謂

從人之心也人心欲吉不從是不吉也卜郊不吉不復為郊牲無所用故免牲免猶縱放不殺之也穀梁傳曰免牲者為之緇衣纁裳有司立端奉送至于南郊免牛亦然左傳無說其事或然也桓五年傳例曰凡祀啟蟄而郊啟蟄周之三月也今於夏四月卜郊者傳舉節氣有前有却但使春分未過仍得為郊故四月得卜郊也故釋例曰凡十二月而節氣有二十四共通三百六十六日分為四時間之以閏月故節不必得恒在其月初而中氣亦不得恒在其月之半是以傳舉天宿氣節為文而不以月為正僖公襄公夏四月卜郊但譏其非所

宜卜而不譏其四月不可郊也孟獻子曰啟蟄而郊郊而後耕耕謂春分也言得啟蟄當卜郊不得過春分耳是言四月得郊也周禮太宰職云祀五帝前期十日帥執事而卜日然則將祭必十日之前豫卜之也言四卜郊者蓋三月每旬一卜至四月上旬更一卜乃成為四卜也此言四卜郊不從襄七年三卜郊不從公羊傳曰曷為或言三卜或言四卜三卜禮也四卜非禮也三卜何以禮求吉之道三今左傳以為禮不卜常祀則一卜亦非不云四非而三

是異於公羊說

猶三望注

三望分野之星國中山川

皆郊祀望而祭之魯廢郊天而修其小祀故曰猶猶者

可止之辭音義

分扶問反

疏

正義曰公羊傳曰三望者何望祭也然則曷祭祭泰山河海鄭

玄以為望者祭山川之名諸侯之祭山川在其地則祭之非其地則不祭且魯竟不及於河禹貢海岱及淮惟

徐州徐即魯地三望謂淮海岱也賈逵服虔以為三望分野之星國之山川今杜亦從之以襄九年傳曰陶唐氏之火正閼伯居商丘祀大火相土因之故商主大火昭元年傳云辰為商星參為晉星楚語云天子徧祀羣神品物諸侯二王後祀天地三辰及其土地之山川注國語者皆云諸侯二王後祀天地三辰日月星也非二王後祀分野星辰山川也以此知三望分野之星國內山川其義是也昭七年夏四月甲辰朔日有食之於時夏之二月日在降婁傳稱去衛地如魯地於十二次豕韋衛地降婁魯地魯祭分野之星其祭奎婁之神也此三望者因郊祀天而望祭之於法不獨祭也魯既廢郊天而獨修小祀故曰猶公羊穀梁皆云猶者可止之辭

秋七月

冬杞伯姬來求婦注無傳自為其子成昏音義

偽為反

狄圍衛十有二月衛遷于帝丘注辟狄難也帝丘今東

郡濮陽縣故帝顓頊之虛故曰帝丘音義

難乃旦反顓音專項許玉

反虛起疏正義曰傳稱狄圍衛衛遷于帝丘盖有險阻

魚反可以辟狄難也釋例曰帝丘故帝顓頊之虛

故曰帝丘昆吾氏因之故曰昆吾之虛東郡濮陽縣是也

傳三十一年春取濟西田分曹地也注二十八年晉

文討曹分其地竟界未定至是乃以賜諸侯音義

音竟

境使臧文仲往宿於重館注高平方與縣西北有重

鄉城音義

重直龍反註同方音房與音預

重館人告曰晉新得諸侯

必親其共不速行將無及也從之分曹地自洮以南

東傳于濟盡曹地也注文仲不書請田而已非聘享

會同也濟水自滎陽東過魯之西至樂安入海音義

洮吐刁反傳音附疏正義曰魯語說此事云獲地於
盡津忍反樂音洛諸侯為多臧文仲反既復命為

之請曰地之多重館人之力也臣聞之曰善有章雖
賤賞也今一言而辟竟其章大矣請賞之乃出而爵

之襄仲如晉拜曹田也○夏四月卜郊不從乃免

牲非禮也注諸侯不得郊天魯以周公故得用天子

禮樂故郊為魯常祀疏

正義曰明堂位稱成王幼弱
周公踐天子之位以治天下

制禮作樂七年致政於成王成王以周公為有勲勞於天下命魯公世世祀周公以天子之禮樂是以魯君孟春乘大輅載弧韜旂十有二旒日月之章祀帝于郊配以后稷天子之禮也是魯以周公之故得用天子禮樂天子命之則為常祀故郊為魯之常祀也記言正月謂周正建子之月與傳啟蟄而郊其月不同禮記是後儒所猶三望亦非禮也禮不卜常祀注作不可以難左傳

必其時而卜其牲曰注卜牲與日知吉凶牛卜曰

牲注既得吉日則牛改名曰牲疏

正義曰卜云卜其牲曰則牲之與日

俱下之也必當先卜牲而後卜日卜得吉日則改牛為牲然則牛雖卜吉未得稱牲牲是成用之名不可改名為牲更卜吉凶明知卜牛在卜日之前也此言免牲是已得吉日牲既成矣成七年乃免牛是未得

吉日牲未成也牲成而卜郊上怠慢也注怠於古典慢瀆龜

策望郊之細也不郊亦無望可也○秋晉蒐于清原

作五軍以禦狄注二十八年晉作三行今罷之更為

上下新軍河東聞喜縣北有清原音義行戶郎反趙衰為

卿注二十七年命趙衰為卿讓於欒枝今始從原大

夫為新軍帥音義帥所類反疏正義曰晉語云文公命趙衰為卿讓於欒枝先軫後

又使為卿讓於狐偃狐毛卒又使為卿讓於先且居公曰趙衰三讓其所讓皆社稷之衛也廢讓是廢德

也以趙衰故蒐于清原作五軍使趙衰將新上軍箕鄭佐之胥嬰將下軍先都佐之如彼文正為趙衰作

五軍故特言趙衰為卿以見之於時舊三軍之將佐先軫將中軍卻縠漆佐之先且居將上軍狐偃佐之欒

枝將下軍胥臣佐之國語有其文也

○冬狄圍衛衛遷于帝丘卜曰三

百年疏

正義曰案史記衛世家及年表衛從此年以後歷十九君積四百二十年衛元君乃徙于

野王元君卒子角代立秦滅衛廢角為庶人

衛成公夢康叔曰相奪予享

注相夏后啓之孫居帝丘享祭也音義

卜曰音越或人實反非也

相息亮反注及下同夏戶雅反下同

疏正義曰夏本紀禹生啓啓生太康及仲康仲康生相是為啓之

孫也周禮祭人鬼曰享

公命祀相甯武子不可曰鬼神非其族

類不歆其祀注歆猶饗也音義

歆許金反

祀鄩何事注言

祀鄫夏後自當祀相相之不享於此久矣非衛之罪也
也注言帝丘久不祀相非衛所絕不可以間成王周

公之命祀注諸侯受命各有常祀音義

間間廁之

請改

祀命注改祀相之命疏

正義曰昭七年傳稱晉居夏虛祀鯀而晉侯疾瘳此衛居

帝丘而不合祀相者祭法云鯀障洪水而殛死載在祀典傳稱實為夏郊三代祀之周室既衰晉為盟主當代天子祭絕祀之神故祭鯀為得禮相無功德於民惟當子孫自祭故稱祀鄫何事非衛之罪與鯀異也

○鄭洩駕惡公子瑕鄭伯亦惡之故公子瑕出奔

楚注瑕文公子傳為納瑕張本洩駕亦鄭大夫隱五

年洩駕距此九十年疑非一人音義

惡烏路反下同

經三十有二年春王正月

夏四月己丑鄭伯捷卒注無傳文公也三同盟音義

在捷

妾疏

正義曰經無其葬故言其謚也捷以莊二十二年即位至此與魯十餘同盟言三同盟者但杜數同

盟不例若同盟少者數先君之盟或數大夫之盟或數經不書盟而傳載盟者若同盟多者唯數今君或就今君之中數其大會盟之顯著者此言三同盟者皆據王臣臨盟則八年盟于洮九年于葵丘二十八年于踐土是也劉炫不尋杜意而規其謬非也

衛人侵狄注報前年狄圍衛

秋衛人及狄盟注不地者就狄廬帳盟音義

廬力於反
帳張亮反

疏

正義曰會狄于攢函言地今不言地故云就廬帳盟廬帳即是狄人所居之處上云衛人侵狄及狄盟猶

若公如晉及晉侯盟是指其所居之處故不言地劉炫云春秋時戎狄錯居中國此狄無國都處所直云及狄盟盟於狄之處也以狄俗逐水草無城郭宮室故云就廬帳盟

冬十有二月己卯晉侯重耳卒注同盟踐土翟泉

傳三十二年春楚鬬章請平于晉晉陽處父報之晉

楚始通注陽處父晉大夫晉楚自春秋以來始交使

命為和同音義

使所更反

○夏狄有亂衛人侵狄狄請平

焉○秋衛人及狄盟○冬晉文公卒庚辰將殯于曲

沃注殯窆棺也曲沃有舊宮焉音義

窆彼驗反疏正義一本作塗

曰周禮鄉師職云大喪及葬與匠師御柩及窆執斧以蒞匠師昭十二年傳曰日中而塋禮記皆作封封塋窆聲相近而字改易耳皆謂葬時下棺之名也殯則攢置於西序亦是下棺於地故殯為窆棺也晉武公自曲沃而兼晉國曲沃有舊時宮廟故公卒而往殯焉禮諸侯五日而殯案經文以巳卯卒庚辰是卒之明日即將殯者以曲沃路遠故早行耳禮在牀曰尸在棺曰柩下云柩有聲明是斂於棺而後行也

出絳柩有聲如牛注如牛响聲音義

柩其救反禮云在牀曰尸在棺

曰柩响呼口反

卜偃使大夫拜曰君命大事將有西師過軼

我擊之必大捷焉注聲自樞出故曰君命大事戎事

也卜偃聞秦密謀故因樞聲以正衆心音義

過古禾反又古

卧反軼直結反又音逸

杞子自鄭使告于秦注三十年秦使大

夫杞子戍鄭曰鄭人使我掌其北門之管注管籥也

音義

籥餘若反

若潛師以來國可得也穆公訪諸蹇叔蹇

叔曰勞師以襲遠非所聞也注蹇叔秦大夫音義

蹇紀

輦反

師勞力竭遠主備之無乃不可乎師之所為鄭必

知之勤而無所必有悖心注將害良善音義

悖必內反

且

行千里其誰不知公辭焉注辭不受其言召孟明西

乞白乙使出師於東門之外注孟明百里孟明視西

乞西乞術白乙乙丙疏正義曰世族譜以百里孟明視為百里奚之子則姓

百里名視字孟明也古人之言名字者皆先字後名而連言之其術丙必是名西乞白乙或字或氏不可

明也譜云或以為西乞術白乙丙為蹇叔子案傳稱蹇叔之子與師言其在師中而已若是西乞白乙則

為將帥不得云與也蹇叔哭之曰孟子吾見師之出或說必妄記異聞耳

而不見其入也公使謂之曰爾何知中壽疏正義曰上壽百

二十歲中壽百下壽八十爾墓之木拱矣注合手曰拱言其過老

悖不可用音義

孟子本或作孟兮壽音授又如字拱九勇反

蹇叔之子與

師哭而送之曰晉人禦師必於殽注殽在弘農澠池

縣西音義

殽本又作峭戶交反劉昌宗音豪澠縣善反又縣恐反與芋恕反

殽有二

陵焉注大阜曰陵疏

正義曰釋地云高平曰陸大陸曰阜大阜曰陵李巡曰高平謂

土地豐正名為陸大陸謂土地高大名曰阜阜最高大為陵

其南陵夏后臯之墓

也注臯夏桀之祖父音義

夏戶雅反注同臯古刀反

疏

正義曰夏本紀文桀

父名發桀名履癸

其北陵文王之所辟風雨也注此道在二

殽之間南谷中谷深委曲兩山相嶽故可以辟風雨

古道由此魏武帝西討巴漢惡其險而更開北山高

道音義

辟音避谷古木反又音欲嶽許金反疏正義又音欽本或作嵐力含反惡烏路反曰此

道見在穀是山名俗呼為土穀石穀其阨道在兩穀之間山高而曲兩山參差相映其下雨所不及故可以辟風雨也公羊傳曰蹇叔送其子而戒之曰爾即死必於穀之嶽巖是文王之所辟風雨者也此注言兩山相嶽故可以辟風雨者杜氏此言或取公羊之意嶽字蓋從山但嶽巖是山之貌而云相嶽文亦不順未能審杜意也何休云其處險阻隘勢一人可要百故文王過之驅馳常若辟風雨必死是

間注以其深險故余收爾骨焉秦師遂東注為明年

晉敗秦于穀傳音義

為于偽反

經三十有三年春王二月秦人入滑注滅而書入不能有其地

齊侯使國歸父來聘

夏四月辛巳晉人及姜戎敗秦師于殽注晉侯諱背喪

用兵故通以賤者告姜戎姜姓之戎居晉南鄙戎子駒

支之先也晉人角之諸戎倚之不同陳故言及音義

音背

佩倚居綺反陳直覲反

疏

正義曰杜以諸侯之貶不至稱人故知諱在喪用兵以賤者告也襄十四年傳

戎子駒支自陳此事云謂我諸戎四嶽之裔胄且此云姜戎知是姜姓之戎也角之倚之皆彼傳文耳彼云晉

禦其上戎亢其下是不同陳故言及也
諸戰之陳共用師不言及者皆同陳也

癸巳葬晉文公

狄侵齊

公伐邾取訾婁音義

訾子斯反

秋孚遂帥師伐邾

晉人敗狄于箕注太原陽邑縣南有箕城郤缺稱人者

未為卿疏

正義曰劉炫云案傳晉侯親兵先軫死敵則將帥非郤缺也而稱人者晉諱而以微人告

今知不然者以戰于穀文公未葬故諱其背殯用兵此則文公既葬之後於禮得從戎事又敗狄有功又何恥

諱而以微者告故杜云卻缺稱人未為卿
劉以晉侯稱人同於穀諱而規杜氏非也

冬十月公如齊十有二月公至自齊

乙巳公薨于小寢注小寢內寢也乙巳十一月十二日
經書十二月誤

隕霜不殺草李梅實注無傳書時失也周十一月今九

月霜當微而重重而不能殺草所以為災音義隕于疏

正義曰此在十二月下杜以長歷校之乙巳是十一月
十二日謂經十二月為誤遂以此經四事皆為十一月

夏之九月霜不應重重又不能殺草所以為災也此云
隕霜不殺草定元年冬十月隕霜殺菽穀梁傳曰未可

以殺而殺舉重可殺而不殺
舉輕其意言殺重草輕也

晉人陳人鄭人伐許

傳三十三年春秦師過周北門左右免胄而下注王

城之北門胄兜鍪兵車非大將御者在中故左右下

御不下音義

胄直救反兜丁侯反
鑿亡侯反將子匠反疏正義曰成二年

卻克鄭丘緩為右張侯曰矢貫予手及肘左輪朱殷

傷手而血染左輪是御者在左大將居中也宣十二

年傳稱楚許伯御樂伯攝叔為右樂伯云左射以蔽
是射在左而御在中也鄭玄詩箋云兵車之法左人

持弓右人持矛中人御
車故左右下御不下
超乘者三百乘王孫滿尚幼

觀之言於王曰秦師輕而無禮必敗注謂過天子門

不卷甲束兵超乘示勇音義

乘絕證反下及注皆同輕遣政反下同

疏

正義曰服虔云無禮謂過天子門不橐甲束兵而但免曹呂氏春秋說此事云師行過周王孫滿曰過天子之城宜橐甲束兵左右皆下然則過天子門當卷甲束兵必古有此禮或出司馬兵法其書既亡未見其輕則寡謀無禮則脫注脫易也音義

脫他活反易以鼓反

入

險而脫又不能謀能無敗乎及滑鄭商人弦高將市

於周遇之以乘韋先牛十二犒師注商行賈也乘四

韋先韋乃入牛古者將獻遺於人必有以先之音義

先悉薦反注有以先之同犒

疏

正義曰周禮太宰以九職任萬民六曰商

賈阜通貨賄鄭玄云行曰商處曰賈易云商旅不行是商行賈坐而言行賈者相形以曉人也乘車必駕四馬因以乘為四名禮言乘矢謂四矢此言乘韋謂四韋也遺人之物必以輕先重後故先韋乃入牛老子云雖有拱壁以先四馬不如坐進此道是古者將獻饋必有以先之

曰寡君聞吾子

將步師出於敝邑敢犒從者不腆敝邑為從者之淹

居則具一日之積注腆厚也淹久也積芻米菜薪音

義

步師步猶行也從才用反下同腆他典反

疏

正義曰腆

厚淹久經傳常訓也周禮大行人云王待諸侯之禮上公五積侯伯四積子男三積積皆謂米禾芻薪知

此亦然案掌客上公五積皆視殮牽鄭注云殮牽謂牽牲以往不殺也亦有米禾芻薪鄭又注云上公殮

五牢米二十車禾三十車侯伯四牢米禾皆二十車子男三牢米十車禾二十車芻薪皆倍其禾積既視

殮則米禾芻薪與殮同行則備一夕之衛且使遽告于鄭注遽

傳車疏正義曰釋言云驛遽傳也孫炎曰傳車驛馬也鄭穆公使視客館注

視秦三大夫之舍則束載厲兵秣馬矣注嚴兵待秦

師使皇武子辭焉曰吾子淹久於敝邑唯是脯資餼

牽竭矣注資糧也生曰餼牽謂牛羊豕音義餼許氣反牲腥

曰餼牲疏正義曰聘禮歸餼饗餼五牢飪一牢腥二生曰牽疏正義曰聘禮歸餼饗餼五牢飪一牢腥二生曰牽疏正義曰聘禮歸餼饗餼五牢飪一牢腥二

未殺故云生曰餓牛羊豕可牽行故云牽謂牛羊豕也

為吾子之將行也注示

知其情鄭之有原圃猶秦之有具囿也注原圃具囿

皆囿名音義

國市疏正義曰下注云中牟縣西有圃古反田澤則原圃地名以其地為圃

知與具囿皆圃名也圃者所以養禽獸故令自取其麋鹿焉天子曰苑諸侯曰圃

吾子取其

麋鹿以間敝邑若何注使秦戍自取麋鹿以為行資

令敝邑得間暇若何猶如何滎陽中牟縣西有圃田

澤音義

麋亡悲反間音閑注同令力呈反

杞子奔齊逢孫揚孫奔宋

孟明曰鄭有備矣不可冀也攻之不克圍之不繼吾

其還也滅滑而還○齊國莊子來聘自郊勞至于贈

賄禮成而加之以敏注迎來曰郊勞送去曰贈賄敏

審當於事音義

勞力報反注同賄乎罪反當丁浪反又如字

疏正義曰聘禮賓至于

近郊君使卿朝服用束帛勞及聘事皆畢乃去賓遂行舍於郊公使卿贈如覲幣是來有郊勞去有贈賄

也臧文仲言於公曰國子為政齊猶有禮君其朝焉

臣聞之服於有禮社稷之衛也注為公如齊傳○晉

原軫曰秦違蹇叔而以貪勤民天奉我也注奉與也

音義

奉扶用反注及下同

奉不可失敵不可縱縱敵患生違天

不祥必伐秦師。樂枝曰：未報秦施而伐其師，其為死

君乎？注言以君死故忘秦施。

音義縱子用反下同施始改反注及下同

先軫曰：秦不哀吾喪而伐吾同姓，秦則無禮，何施之為？注言秦以無禮加已，施不足顧。吾聞之一曰：縱敵數世之患也。謀及子孫，可謂死君乎？注言不可謂背

君音義

數所主反背音佩

遂發命，遽興姜戎。子墨衰經。注：晉

文公未葬，故襄公稱子以凶服從戎。故墨之音義

衰七

雷反經直結反

梁弘御戎，萊駒為右。音義

萊音來

夏四月辛巳

敗秦師于殽獲百里孟明視西乞術白乙丙以歸遂

墨以葬文公晉於是始墨注後遂常以為俗記禮所

由變文嬴請三帥注文嬴晉文公始適秦秦穆公所

妻夫人襄公嫡母三帥孟明等音義嬴音盈帥所類反注同妻七計

反嫡丁歷反曰彼實構吾二君寡君若得而食之不厭君

何辱討焉使歸就戮于秦以逞寡君之志若何公許之先軫朝問秦囚公曰夫人請之吾舍之矣先軫怒曰武夫力而拘諸原婦人暫而免諸國注暫猶卒也

音義

厭於豔反又於鹽反戮音六送勅領反拘音俱卒寸忽反

隋軍實而長寇讎

亡無日矣注墮毀也音義

墮許規反長丁丈反

不顧而唾公使

陽處父追之及諸河則在舟中矣釋左驂以公命贈

孟明注欲使還拜謝因而執之音義

唾他卧反驂七南反

孟明

稽首曰君之惠不以累臣累鼓注累囚繫也殺人以

血塗鼓謂之累鼓音義

累力追反累許覲反

使歸就戮于秦寡

君之以為戮死且不朽若從君惠而免之三年將拜

君賜注意欲報伐晉秦伯素服郊次注待之於郊鄉

師而哭曰孤違蹇叔以辱二三子孤之罪也不替孟明孤之過也大夫何罪且吾不以一眚掩大德注眚

過也音義

鄉許亮反替他計反
眚所景反掩於檢反

○狄侵齊因晉喪也

○公伐邾取訾婁以報升陘之役注在二十二年邾

人不設備秋襄仲復伐邾注魯亦因晉喪以陵小國

音義

復扶又反

○狄伐晉及箕八月戊子晉侯敗狄于箕

卻缺獲白狄子注白狄狄別種也故西河郡有白部

胡音義

箕音基種
章勇反

疏

正義曰宣十五年晉師滅赤狄
潞氏以潞子嬰兒歸彼書於經

而此不書者蓋畧賤之不以告也

先軫曰匹夫逞志於君注謂不顧

而唾而無討敢不自討乎免胄入狄師死焉狄人歸

其元注元首面如生注言具有異於人初曰季使過

冀見冀缺耨其妻饁之注曰季胥臣也冀晉邑耨鋤

也野饋曰饁音義

曰其九反使所吏反過古禾反又古卧反耨乃豆反鉏田也饁于輒

反字林于叔反鋤本又作鉏

正義曰世本云垂作耨釋器云斲斲謂之定李

鉏仕居反饋其位反餉也

巡曰鋤也廣雅云定謂之耨呂氏春秋云耨柄尺此

其度也其耨六寸所以間稼也高誘注云耨耘苗也

六寸所以入苗間也釋名云耨鋤嫗耨禾

也釋詁云饁饋也孫炎曰饁野之饋也

敬相待如

賓與之歸言諸文公曰敬德之聚也能敬必有德德以治民君請用之臣聞之出門如賓注如見大賓承事如祭注常謹敬也仁之則也公曰其父有罪可乎

注缺父冀芮欲弑文公在二十四年音義

芮如銳反弑音試或

如字對曰舜之罪也殛鯀其舉也興禹注禹鯀子音義

殛紀力反誅也鯀古本反禹父也

管敬仲桓之賊也實相以濟康誥

曰父不慈子不祗兄不友弟不共不相及也注康誥

周書祗敬也音義

實相息亮反不共音恭

疏

正義曰此雖言康誥曰直引康誥之

意耳非康誥之全文也彼云子弗祗服厥父事大傷厥考心于父不能字厥子乃疾厥子于弟弗念天顯乃弗克恭厥兄兄亦不念鞠子哀大不友于弟曰乃其速由文王作罰刑茲無赦其意言不慈不祗不友不恭各用文王之法刑之不是罪子又罪父刑弟復刑兄是其不相及也詩曰采葑采菲無以下體君取節焉可也注詩國風也葑菲之菜上

善下惡食之者不以其惡而棄其善言可取其善節

音義

葑芳逢反
菲芳匪反

疏

正義曰彼毛傳曰葑須也菲芴也釋草云須葑孫炎曰須一名葑鄭

玄坊記注云葑蔓菁也釋草又云菲芴也孫炎曰菑類也陸璣毛詩義疏云葑蔓菁幽州人或謂之芥也菲似菑莖麓葉厚而長有毛三月中蒸煑為茹滑美又可以為羹是也此二菜其根有惡詩故云上善下

惡食之者
取善節也

文公以為下軍大夫反自箕襄公以三命

命先且居將中軍注且居先軫之子其父死敵故進

之音義

且子徐反
將子匠反

疏

正義曰且居父在之時已
將上軍以父死敵故進之

以再

命命先茅之縣賞胥臣曰舉卻缺子之功也注先茅

絕後故取其縣以賞胥臣以一命命卻缺為卿復與

之冀注還其父故邑音義

復扶又反
又音服

亦未有軍行注

雖登卿位未有軍列音義

行戶
剛反

○冬公如齊朝且弔

有狄師也反薨于小寢即安也注小寢夫人寢也譏

公就所安不終于路寢○晉陳鄭伐許討其貳於楚

也楚令尹子上侵陳蔡陳蔡成遂伐鄭將納公子瑕

注三十一年瑕奔楚門于桔柣之門瑕覆于周氏之

汪注車傾覆池水中音義桔戶結反柣大結反覆外

僕髡屯禽之以獻注殺瑕以獻鄭伯音義髡苦門反

文夫人斂而葬之鄆城之下注鄭文公夫人也鄆城

故鄆國在滎陽密縣東北傳言穆公所以遂有國音

義斂力豔反鄆古外反○晉陽處父侵蔡楚子上救之與晉師

夾氐而軍注氐水出魯陽縣東經襄城定陵入汝音

義

夾古洽反一音古協反氐音雉又直里反又徒死反

陽子患之使謂子上曰

吾聞之文不犯順武不違敵子若欲戰則吾退舍子

濟而陳注欲辟楚使渡成陳而後戰音義

陳直觀反注同

遲

速唯命不然紓我注紓緩也音義

紓音舒一音直呂反

老師費

財亦無益也注師久為老音義

費芳味反

乃駕以待子上

欲涉大孫伯曰不可晉人無信半涉而薄我悔敗何

及不如紓之乃退舍注楚退欲使晉渡陽子宣言曰

楚師遁矣遂歸楚師亦歸太子商臣譖子上曰受晉賂而避之楚之耻也罪莫大焉王殺子上注商臣怨

子上止王立已故譖之音義

遁徒困反

○葬僖公緩注文

公元年經書四月葬僖公僖公實以今年十一月薨并閏七月乃葬故傳云緩自此以下遂因說作主祭祀之事文相次也皆當次在經葬僖公下今在此簡

編倒錯音義

編必連反又布千反倒丁老反

疏

正義曰經書十二月下云乙巳公薨杜以

長歷推之十一月十二日有乙巳乙巳非十二月文元年傳曰於是閏三月非禮也故至四月并閏為七

月禮當五月而葬今乃七月始葬故傳曰緩也左氏為傳凡有譏者皆先言所譏乃復述其事自此以下不論葬緩既言葬之緩遂因說作主祭祀之事皆事與葬連故文相次耳僖公葬在明年而此年有傳知其當在明年經葬僖公下今在此者簡編倒錯故爾杜以此年空說葬事而其上無經文元年空舉經而其下無傳故謂此年之傳當在彼經之下於理誠為順序於文失於重疊此云葬僖公彼又云葬僖公重生文者亦既錯謬必乖其本或可編絕之處三字分簡彼有葬無公此有公無葬後人竝添足之致使彼此共剩一文耳若其作主非禮也注文二年乃作主不然不知所以謬也

遂因葬文通譏之凡君薨卒哭而祔祔而作主特祀於主注既葬反虞則免喪故曰卒哭哭止也以新死

者之神祔之於祖尸柩已遠孝子思慕故造木主立
几筵焉特用喪禮祭祀於寢不同之於宗廟言凡君
者謂諸侯以上不通於卿大夫音義附音 烝嘗禘於

廟注冬祭曰烝秋祭曰嘗新主既立特祀於寢則宗

廟四時常祀自如舊也三年禮畢又大禘乃皆同於

吉音義

烝之承反 禘大計反 疏正義曰釋例云此諸侯之禮故

卒哭哭止也以新死者之神祔之於祖尸柩既已遠矣神形又不可得而見矣孝子之思彌篤徬徨求索不知所至故造木主立几筵特用喪禮祭祀於寢不同之於宗廟宗廟則復用四時烝嘗之禮也三年喪

畢致新死者之主以進於廟廟之遠主當遷入祧於是乃大祭於太廟以審定昭穆謂之禘此皆自諸侯上達天子之制也其意與此注同文少詳耳劉炫云既言作主非禮因言作主祭祀吉凶之節凡諸侯之薨葬日而虞從是以後間日一虞七虞之後明日而為卒哭之祭卒哭之明日而作祔祭以新死之神祔於祖父於此祔祭而作木主以依神其主在寢特用喪禮祭祀於在寢之主其四時常祭祔祀烝嘗及三年喪畢為大祀禘祭竝行之於廟正禮當如是耳今以葬僖公後積十月始作僖公木主是作主太緩故為非禮也注既葬反虞至大夫正義曰檀弓曰既封有司以几筵舍奠於墓左反日中而虞葬日虞弗忍一日離也雜記曰士三虞大夫五諸侯七士虞記曰始虞用柔日再虞皆如初三虞卒哭用剛日如士虞之禮諸侯七虞其六虞用柔日最後虞改用剛日間一日乃卒哭卒哭亦用剛日則諸侯卒哭在葬後十

四日也然始免喪與葬不得相遠共在一月之內故杜每云既葬卒哭衰麻除是其不甚相遠然喪事先遠日則葬在月半之後葬後行虞虞後卒哭所以得同月者但卜葬雖先遠日但葬是喪之大事又有虞祔之祭當應及早為之使得容其虞祔禮云喪事先遠日謂練祥禫除之屬晉平公之喪大夫欲見新君王與文伯宴樽以魯壺皆是既葬之後未卒哭之前雜記曰天子七月而葬九月而卒哭諸侯五月而葬七月而卒哭釋例云禮記後人所作不與春秋同是七虞九虞杜所不用或云杜亦同之解云此注言虞則免喪者謂七虞皆畢乃免喪免喪後日為卒哭也理亦通耳檀弓曰葬日虞是日也以虞易奠卒哭曰成事是日也以吉祭易喪祭是葬前奠而不祭至虞乃為喪祭卒哭乃為吉祭也自初死至於卒哭晝夜哭無時謂之卒哭者卒此無時之哭自此以後唯朝夕哭耳天子諸侯則於此除喪全不復哭也檀弓於

卒哭之下云明日祔於祖父士虞記亦云卒哭明日以其班祔是以新死之神祔之於祖也於此之時葬已多日尸柩既已遠矣孝子思慕彌篤彷徨不知所至故造木主立几筵以依神也作主置之於寢特用喪祭之禮祭之於寢不同祭之於宗廟也大夫以下不得稱君此言凡君者謂諸侯以上耳不得通於卿大夫也文二年公羊傳曰主者曷用虞主用桑練主用栗鄭玄注禮用公羊之說以為虞已有主此傳稱祔而作主者虞而作主禮本無文不可以公羊而疑左氏也注冬祭曰烝至於吉正義曰周禮禮記諸文皆有之也新主既特祀於寢而其餘宗廟四時常祀自如舊不廢也三年喪畢新主入廟廟之遠主當遷入祧乃為大祭於太廟以審昭穆謂之為禘於是新死者乃得同於吉也釋例曰舊說以為諸侯喪三年之後乃烝嘗按傳襄公十五年冬十一月晉侯周卒十六年春葬晉悼公改服脩官烝于曲沃會于溴梁

其冬穆叔如晉且言齊故晉人答以寡君之未禘祀其後晉人徵朝于鄭鄭公孫僑云溴梁之明年公孫夏從寡君以朝于君見於嘗酎與執膳焉此皆春秋之明證也是言知諸侯卒哭以後時祭不廢之事也釋例又曰凡三年喪畢而後禘於是遂以三年為節仍計除喪即吉之月卜日而後行事無復常月也是以經書禘及大事傳唯見莊公之速他無非時之譏也如例所言除喪即吉禘遂以三年為常則新君即位二年而禘五年又禘八年又禘僖八年禘于太廟宣八年有事于太廟定八年從祀先公皆得三年之常期也按元年夫人姜氏薨當以三年喪畢而禘再經三年則九年乃可禘耳而得八年禘者哀姜喪畢不為作禘八年因禘祭乃致之故計閔公之喪數之耳昭十五年有事于武宮計非禘年而為禘者釋例曰禘于太廟禮之常也各於其宮時之為也雖非三年大祭而書禘用禘禮也昭二十五年傳曰將禘於

襄公亦其義也三年之禘自國之常常事不書故唯書此數事祭雖得常亦記仲遂叔弓之非常也如杜此言昭十五年雖非禘年用禘禮故稱禘也鄭玄解禮三年一禘五年一禘杜解左傳都不言禘者以左傳無禘語則禘禘正是一祭故杜以審諦昭穆謂之為禘明其更無禘也古禮多亡未知孰是且使禮傳各從其家而為之說耳劉炫云以正經無禘文也唯禮記毛詩有禘字耳釋天云禘大祭也則祭無大於禘者若禘大於禘禘者若禘大於禘禘焉得稱大乎

春秋左傳注疏卷十六

春秋左氏傳注疏卷十六考證

會王人晉人宋人齊人陳人蔡人秦人盟于翟泉。○臣

浩

按公羊穀梁會字上皆有公字左氏經無之傳發貶卿稱人之義矣程子曰晉文連年會盟皆在王畿之側而此盟復迫王城又與王人盟強逼甚矣故諱公諸侯貶稱人惡之大也

傳夏公會王子虎晉狐偃宋公孫固齊國歸父陳轅濤塗秦小子憖盟于翟泉注秦小子憖在蔡下者若宋

向戌之後會○趙汭補注曰秦伯爵國其大夫自合
班蔡國大夫下非為後至成二年秦右大夫說在宋
華元陳公孫寧上乃楚人為之不可據以為例

又疏公孫固序在齊上者蓋為大司馬尊於歸父歸
父雖執齊政不廢身非上卿如管仲之類○臣召南

按高氏國氏乃齊之命大夫世為上卿傳十二年管
仲之言可證不得云非上卿也此會宋序齊上或是
王子虎以國之列爵為序故齊次宋耳

傳卿不書罪之也。○劉敞曰：翟泉在王城之內，諸侯之大夫入天子之境，雖貴曰士陪臣也，而盟于天子之側，自此始，是以貶也。又意林曰：列國之卿亂王室之禮，王子虎不能正也，使陪臣盟天子之側，所謂下陵上替也。

天王使宰周公來聘，注周公天子三公兼冢宰也。○孫覺曰：禮雖有天子聘諸侯之義，然義不可使三公書使宰周公來聘，見周道之衰而諸侯強盛也。

傳東門襄仲將聘于周○陳則通春秋提綱曰二百四十二年之間魯紀無聘周之文亦無實聘周之意公子遂之聘報周公也叔孫得臣之聘因毛伯也黃仲炎通說曰凡書大夫如京師者見諸侯不朝而聘也衛遷于帝丘注今東郡濮陽縣○臣召南按漢書地理志曰東郡濮陽衛成公自楚丘徙此故帝丘顓頊虛又後漢郡國志注引皇覽曰顓頊冢在城門外廣陽里中

傳晉蒐于清原作五軍以禦狄趙衰為卿○趙汭補注
曰上下新軍帥皆卿也晉于是乎有八卿

傳衛成公夢康叔曰相奪予享注相夏后啟之孫居帝
丘○臣召南按夏后相居帝丘惟据此傳伍員曰昔
有過澆殺斟灌以伐斟尋滅夏后相斟灌亦衛地后
相居帝丘依之耳汲郡古文則直謂相居斟灌

傳其南陵夏后皋之墓也○臣召南按史記夏本紀夏

帝孔甲子為帝皋通鑑前編后皋在位十一歲子發

踐位十九歲子癸踐位是為桀

十有二月乙巳注乙巳十一月十二日經書十二月誤
○萬斯大學春秋隨筆曰經傳所書日月杜氏每以
長歷推校或言經誤或言傳誤甚不然之獨是經言
誤不可謂非文元年書二月癸亥日有食之此二日
也從癸亥逆推正月朔非壬辰則癸巳乙巳距壬辰
癸巳四十八九日則在十一月明矣

傳葬僖公緩○趙汭補注曰劉氏云杜氏欲讀緩以上

為一句非也蓋春秋周歷本差而後世追算又互有得失杜氏惟據長歷釋經遂以此年十二月所書四事皆為十一月亦固矣

臣召南

按如劉敞說當以緩

字連下讀曰緩作主非禮也

傳烝嘗禘于廟○朱子曰左氏烝嘗禘于廟與王制喪三年不祭者不合

臣召南

按襄十六年春葬晉悼公

傳言改服修官烝于曲沃則當時之事皆然非周禮

之舊也

春秋左氏傳注疏卷十六考證

欽定四庫全書薈要卷一千一百三十三

經部

春秋左傳注疏卷十七

起文公元年盡四年

晉杜氏注 唐陸德明音義 孔穎達疏

文公音義

陸曰文公名興僖公子母聲姜謚法慈惠愛民曰文忠信接禮曰文

疏 正義曰魯

世家文公名興僖公之子夫人聲姜所生以襄王二十六年即位謚法慈惠愛民曰文是歲歲在降婁

經元年春王正月公即位注無傳先君未葬而公即位

不可曠年無君疏

正義曰諸侯之禮既葬成君先君雖則未葬既踰年矣而君即位者不可

曠年無君故也即位必於歲首若歲首不行此禮餘月不得行之便是曠年無君故雖則未葬亦即行之釋例

曰遭喪繼立者每新年正月必改元正位百官以序故
國史書即位於策以表之文公成公先君之喪未葬而
書即位因三正之始明繼嗣之正表朝儀以固百姓之
心此乃國君明分制之大禮譬周康王麻冕黼裳以行
事事畢然後反喪服也雖踰年行即位之禮名通於國
內必須既葬卒哭乃免喪古之制也杜引顧命康王之
事以譬此者彼是既殯此是踰年雖時不同取其暫服
吉服事相似耳康王之誥云王義嗣德答拜彼始殯訖
即呼為王知諸侯既殯臣子亦呼為公既尸其位名號
即成但先君未葬事猶聽於冢宰未得即成為君八年
八月天王崩九年春毛伯來求金傳曰不書王命未葬
也是踰年未葬不得命臣出使必待卒哭乃免喪也

二月癸亥日有食之注無傳癸亥月一日不書朔官失
之

天王使叔服來會葬注叔氏服字諸侯喪天子使大夫

會葬禮也疏

正義曰四年風氏薨五年王使榮叔歸含且賵召昭公來會葬傳曰禮也夫人之喪

會葬為禮知諸侯之喪天子使大夫會葬為得也蘇氏云外卿來會葬不書此書者尊王使故特書之傳稱內史叔服內史於周禮為中大夫天子大夫例書字知叔氏服字也

夏四月丁巳葬我君僖公注七月而葬緩

天王使毛伯來錫公命注毛國伯爵諸侯為王卿士者

諸侯即位天子賜以命圭合瑞為信僖十一年王賜晉

侯命亦其比也音義

錫呈歷反比必利反例也又如字疏
正義曰僖二十四年傳有

原伯毛伯杜云原毛皆采邑此毛與彼計是一人而注
不同者此毛當是文王之子封為畿外之國於時諸侯
無復有毛或是世事王朝本封絕滅從此以後常稱毛
伯國名尚存仍為伯爵必受得采邑為畿內諸侯故注
彼云采邑此云國也封爵既存故云諸侯為王卿士者
周禮大宗伯以玉作六瑞以等邦國王執鎮圭公執桓
圭侯執信圭伯執躬圭子執穀璧男執蒲璧冬官玉人
桓圭以下皆謂之命圭是用之以命諸侯也諸侯即位
天子賜之以命圭魯是侯爵當賜之以信圭也玉人又
云天子執冒四寸以朝諸侯其冒邪刻其下與圭頭相
合諸侯執圭以朝天子天子執冒以冒之觀其相當以
否所以合瑞為信也僖十一年晉惠公新立王賜之命
此亦新立是其比也傳稱晉侯受玉惰以此知賜命必
有玉也公羊傳曰錫者何賜也命者何加我服也唐風
無衣之篇晉人為其君請命於天子之使以無衣為
辭則賜命亦有服杜不言服者主於玉而畧之耳

晉侯伐衛注晉襄公先告諸侯而伐衛雖大夫親伐而稱晉侯從告辭也

叔孫得臣如京師注得臣叔牙之孫

衛人伐晉注衛孔達為政不共盟主興兵鄰國受討喪

邑故貶稱人音義

喪息浪反

秋公孫教會晉侯于戚注戚衛邑在頓丘衛縣西禮卿

不會公侯而春秋魯大夫皆不貶者體例已舉故據用

魯史成文而已內稱公卒稱薨皆用魯史疏

正義曰僖二十九年

翟泉之盟諸侯之卿為會魯侯故貶稱人則魯卿會他諸侯亦合貶而春秋魯大夫皆不貶者貶他國之卿已成體例體例已舉於魯不須加貶理足可明故據用魯史成文不復改易也他國君書卒及爵內常稱公稱薨亦體例已舉皆用魯史也

冬十月丁未楚世子商臣弑其君顧注商臣穆王也弑

君例在宣四年音義

顧憂倫反又丘倫反

公孫敖如齊注傳例曰始聘焉禮也

傳元年春王使內史叔服來會葬公孫敖聞其能相

人也注公孫敖魯大夫慶父之子音義

相息亮反

見其二

子焉叔服曰穀也食子難也收子注穀文伯難惠叔

食子奉祭祀供養者也收子葬子身也音義

見賢遍反下注

孤見同食音嗣注同難乃多反又如字供俱用反養餘亮反

穀也豐下必有後於

魯國注豐下盖面方為八年公孫敖奔莒傳○於是

閏三月非禮也注於歷法閏當在僖公末年誤於今

年三月置閏盖時達歷者所譏先王之正時也履端

於始舉正於中歸餘於終注步歷之始以為術之端

首暮之日三百六十有六日日月之行又有遲速而

必分為十二月舉中氣以正月有餘日則歸之於終

積而為閏故言歸餘於終音義

暮居其反

履端於始序則

不愆注四時無愆過音義

愆起虔反

舉正於中民則不惑

注斗建不失其次寒暑不失其常故無疑惑歸餘於

終事則不悖注四時得所則事無悖亂音義

悖必內反

疏

正義曰於是年魯歷置閏閏三月非禮也言於禮置閏不當在此月也因論置閏之法先王之正時也履端於始履步也謂推步歷之初始以為術歷之端首舉月之正半在於中氣歸其餘分置於終末言於終末乃置閏也更復申之履端於始序則不愆謂四時之序不愆過也舉正於中民視瞻則不疑惑也歸餘

於終於時事則不悖亂也此年不合置閏而置閏則不是歸餘於終故為非禮也注正義曰古今歷法推閏月之術皆以閏餘減章歲餘以歲中乘之章閏而一所得為積月命起天正算外閏所在也其有進退以中氣定之無中氣則閏月也古歷十九年為一章章有七閏八章三年閏九月六年閏六月九年閏三月十一年閏十一月十四年閏八月十七年閏四月十九年閏十二月此據元首初章若於後漸積餘分大率三十二月則置閏不必恒同初章閏月僖五年正月辛亥朔日南至治歷者皆以彼為章首之歲漢書律歷志云文公元年距僖五年辛亥二十九歲是歲閏餘十三閏當在十一月後而在三月故傳曰非禮也志之所言閏當在此年十一月後今三月已即置閏是嫌閏月大近前也杜以為僖三十年閏九月文二年閏正月故言於歷法閏當在僖公末年誤於今年置閏嫌置閏大近後也杜為長歷置閏疏數無

復定準凡為歷者閏前之月中氣在晦閏後之月中氣在朔僖五年正月朔旦冬至則四年當閏十二月也杜長歷僖元年閏十一月五年閏十二月與常歷不同者杜以襄二十七年再失閏司歷過昭二十年二月己丑日南至哀十二年十二月蝥云火猶西流司歷過則春秋之世歷法錯失所置閏月或先或後不與常同杜唯勘經傳上下日月以為長歷若日月同者則數年不置閏月若日月不同須置閏乃同者則未滿三十二月頻置閏所以異於常歷故釋例云春秋日有頻月而食者有曠年不食者理不得一一如算以守恒數故歷無有不失也始失於毫毛尚未可覺積而成多以失弦望朔晦則不得不改憲以順之書所謂欽若昊天歷象日月星辰易所謂治歷明時言當順天以求合非苟合以驗天者也故當修經傳日月以考晦朔以推時驗下又云據經傳微旨考日辰晦朔以相發明為經傳長歷未必得天蓋春秋

當時之歷也是杜自言不與常歷同注正義曰日月
轉運於天猶如人之行步故推歷謂之步歷步歷之
始以為術之端首謂歷之上元必以日月全數為始
於前更無餘分以此日為術之端首故言履端於始
也暮之日三百六十有六日謂從冬至至冬至必滿
此數乃周天也日月之行有遲有速日行遲月行速
凡二十九日過半月行及日謂之一月過半者謂一
日於歷法分為九百四十分月行及日必四百九十
九分是過半二十九分今一歲氣周有三百六十五
日四分日之一其十二月一周唯三百五十四日是
少十一日四分日之一未得氣周細而言之一歲只
少弱十一日所以然者一月有餘分二十九一年十
二月有餘分三百四十八是一歲既得三百五十四
日又得餘分三百四十八其四分日之一一日為九
百四十分則四分日之一為二百三十五分今於餘
分三百四十八內取二百三十五以當卻四分日之

一餘分仍有一百一十三其整日唯有十一日又以餘分一百一十三減其一日九百四十分唯有八百二十七分是一年有餘十日八百二十七分少一百一十三分不成十一日也劉炫云計一歲為十二月猶有十一日有餘未得周也分一周之日為十二月則每月常三十日餘計月及日為一月則每月唯二十九日餘前朔後朔相去二十九日餘前氣後氣相去三十日餘每月參差氣漸不正但觀中氣所在以為此月之正取中氣以正月故言舉正於中也月朔之與月節每月剩一日有餘所有餘日歸之於終積成一月則置之為閏故言歸餘於終注正義曰閏後之月中氣在朔則斗柄月初已指所建之辰閏前之月中氣在晦則斗柄月末方指所建之辰故舉月之正在於中氣則斗柄常不失其所指之次如是乃得寒暑不失其常

○夏四月丁巳葬僖公注傳皆不虛載經文

而此經孤見知僖公末年傳宜在此下○王使毛伯

衛來錫公命注衛毛伯字音義

本作毛伯衛來錫公命一本作天王使

疏

正義曰知是字者以天子公卿例書爵不言名大夫稱字故毛伯雖卿或稱字案僖九年公會宰周

公云云杜云三公不字明卿或書字

叔孫得臣如周拜注謝賜命○晉

文公之季年諸侯朝晉衛成公不朝使孔達侵鄭伐

緜訾及匡注孔達衛大夫匡在潁川新汲縣東北音

義

訾子斯反汲居及反

晉襄公既祥注諸侯雖諒闇亦因祥祭

為位而哭音義

諒音良又音亮

疏

正義曰禮暮而小祥晉文公以僖三十二年十二月

卒則三十三年十二月為使告于諸侯而伐衛及南

小祥此云既祥謂小祥也

陽注今河內地先且居曰效尤禍也注尤衛不朝故

伐今不朝王是效衛致禍時王在溫故勸之音義

且子

餘反請君朝王臣從師晉侯朝王于溫先且居胥臣伐

衛五月辛酉朔晉師圍戚六月戊戌取之獲孫昭子

注昭子衛大夫食戚邑衛人使告于陳陳共公曰更

伐之我辭之注見伐求和不競太甚故使報伐示已

力足以距晉音義

共音恭更古孟反又音庚大音泰又如字

衛孔達帥師

伐晉君子以為古古者越國而謀注合古之道而失

今事霸主之禮故國失其邑身見執辱疏

正義曰釋例云衛孔

達為政不共盟主興兵於鄰國受討喪邑寔而告陳雖從陳之謀僅得自定以謀而濟故君子但言合古而不釋其尤也劉炫云春秋之時天子微弱霸主秉德刑以長諸侯諸侯從時命以事霸主大事小小事大所以相保恃也晉之與衛小大不同而恥於受屈望以彊獲免明王在上理在可然度時之宜則非善計君子以為合古之道失當今

○秋晉侯疆戚田故

公孫敖會之注晉取衛田正其疆界音義

疆居良反注同

○

初楚子將以商臣為大子訪諸令尹子上子上曰君

之齒未也注齒年也言尚少音義

少詩照反下文同

而又多

愛黜乃亂也楚國之舉恒在少者注舉立也且是人

也逢蠱目而豺聲忍人也注能忍行不義音義

蠱本又作蜂芳

逢反豺什皆反

不可立也弗聽既又欲立王子職而黜大子

商臣注職商臣庶弟也商臣聞之而未察告其師潘

崇曰若之何而察之潘崇曰享江芊而勿敬也注江

芊成王妹嫁於江音義

芊亡氏反史記以為成王妾

從之江芊怒

曰呼役夫注呼發聲也役夫賤者稱音義

呼報賀反注同役夫

如字稱尺證反

宜君王之欲殺女而立職也告潘崇曰信矣

潘崇曰能事諸乎注問能事職不音義

女音汝

曰不能

能行乎曰不能能行大事乎曰能注大事謂弑君音

義

弑申志反一本無此注

冬十月以宮甲圍成王注大子宮甲

僖二十八年王以東宮卒從子玉蓋取此宮甲音義

卒子忽反從如字又才用反

王請食熊蹯而死注熊掌難熟冀久

將有外救音義

蹯音煩

弗聽丁未王縊諡之曰靈不瞑

曰成乃瞑注言其忍甚未斂而加惡諡音義

瞑亡丁反又亡

千反斂疏

正義曰既見其不瞑目則是未斂於棺故知未斂也禮葬乃加諡未斂而加惡諡言

其忍之甚也冤枉之人衆矣未有能見其靈此事特為商臣忍甚耳桓譚以為自縊而死其目未合尸冷乃瞑非由諡之善惡也亂而不損曰靈安民立政曰成

穆王立以其為天子之

室與潘崇疏

正義曰商臣今既為王以其為天子之時所居室內財物僕妾盡以與潘崇非

與其所居之宮室也

使為大師且掌環列之尹注環列之尹宮

衛之官列兵而環王宮音義

大音泰環如字又音患

○穆伯如

齊始聘焉禮也注穆伯公孫敖凡君即位卿出並聘

疏

正義曰即位者既葬除喪即成君之吉位也唯以既葬為限不以踰年為斷八年八月天王崩九年

春毛伯來求金傳曰不書王命未葬也是未葬雖踰年不得命臣出使也宣十年夏四月齊侯元卒六月葬齊惠公冬齊侯使國佐來聘是既葬未踰年得命臣出使也何休膏肓以為三年之喪使卿出聘於義左氏為短鄭康成歲云周禮諸侯邦交歲相問殷相聘世相朝左氏合古禮何以難之

踐脩舊

要好結外援注踐猶履行也音義

好呼報反下及注同要於遙反援于

春反好事鄰國以衛社稷忠信卑讓之道也忠德之正

也信德之固也卑讓德之基也注傳因此發凡以明

諸侯諒闇則國事皆用吉禮○穀之役注在僖三十

三年晉人既歸秦帥秦大夫及左右皆言於秦伯曰

是敗也孟明之罪也必殺之秦伯曰是孤之罪也周

芮良夫之詩曰大風有隧貪人敗類注詩大雅隧蹊

徑也周大夫芮伯刺厲王言貪人之敗善類若大風

之行毀壞衆物所在成蹊徑音義

帥所類反芮如銳反詩大雅桑桑篇

隧音遂道也敗必邁反注同蹊音兮徑古定反

聽言則對誦言如醉注言昏

亂之君不好典誦之言聞之若醉得道聽塗說之言

則喜而答對音義

誦似用反昏本亦作惛音昏

匪用其良覆俾我

惇注覆反也俾使也不用良臣之言反使我為惇亂

音義

覆芳服反俾本亦作卑必爾反注同

是貪故也孤之謂矣孤實貪

以禍夫子夫子何罪復使為政注為明年秦晉戰彭

衙傳音義

復扶又反

經二年春王二月甲子晉侯及秦師戰于彭衙秦師敗

績注孟明名氏不見非命卿也大崩曰敗績馮翊郃陽

縣西北有彭衙城音義

衙音牙見賢遍反郃戶納反

疏

正義曰於例將卑師衆稱

師今稱秦師知將非尊者故云孟明名氏不見非命卿也傳稱秦伯不廢孟明復使為政則孟明秦之執政之卿也而言非卿者成二年注云曹大夫常不書而書公子首者首命於國備於禮成為卿故也然則備卿禮乃

成為卿禮不備則不書秦是辟陋之國不以卿禮成孟明不言孟明非執政也此年晉士穀堪其事故名書於垂隴襄二十九年鄭公孫段攝卿以行名見於城杞況此真卿而不書者以秦辟陋在我異於中國禮命不足故云非命卿也

丁丑作僖公主注主者殷人以栢周人以栗三年喪終

則遷入於廟疏

正義曰主所用木經無正文公羊傳曰主者曷用虞主用桑練主用栗左傳唯

言祔而作主主一而已非虞練再作公羊之言不可通於此也論語哀公問主於宰我宰我對曰夏后氏以松殷人以栢周人以栗先儒舊解或有以為宗廟主者故杜依用之案古論語及孔鄭皆以為社主社為木主者古論不行於世且社主周禮謂之田主無單稱主者以張包周等並為廟主故社所依用劉炫就所以規杜過

未為得也

三月乙巳及晉處父盟注處父為晉正卿不能匡君以

禮而親與公盟故貶其族族去則非卿故以微人常稱

為耦以直厭不直不地者盟晉都音義

去起呂反稱尺證反厭於涉反

疏正義曰春秋卿則書名氏賤者則稱人外卿之貶例

皆稱人魯卿之貶乃去其族去族與稱人相類即是

不為卿也處父為晉正卿不能匡君以禮君使盟魯即

從君命親與公盟故貶去其族若言處父是晉之賤人

則不復書公直言及晉處父盟若言魯之賤人往與之

盟也魯之賤人不合書名舉其所為之事而已言及不

言名是微人之常稱也以微人常稱與處父為偶若處

父亦賤人也魯以微人敵微人直也晉以卿敵公不直

也如此書經者以魯之直厭晉之不直也然則不貶處父稱人者貶之稱人則惡名不見貶其族留其名所以惡處父也釋例曰隨例稱人則所罪之名不章故特書處父也翟泉澶淵亦會公侯所以稱人者以其衆卿非一依例總貶不地者盟於晉之都也諸侯會聚盟於他國之都者即以國名為盟地魯之君臣獨往他國而與之盟者不復舉國地三年冬公如晉十二月公及晉侯盟是也

夏六月公孫敖會宋公陳侯鄭伯晉士穀盟于垂隴注

垂隴鄭地滎陽縣東有隴城士穀出盟諸侯受成於衛

故貴而書名氏音義

穀戶木反本亦作穀同隴力勇反

自十有二月不雨至于秋七月注無傳周七月今五月

也不雨足為災不書旱五穀猶有收音義

收如字又手又反

八月丁卯大事于大廟躋僖公注大事禘也躋升也僖

公閔公庶兄繼閔而立廟坐宜次閔下今升在閔上故

書而譏之時未應吉禘而於大廟行之其譏已明徒以

逆祀故特大其事異其文音義

大廟音泰注及傳大廟同躋子兮反坐未卧反

又如疏

正義曰昭十五年有事于武宮傳稱禘于武宮有事是禘則知大事亦是禘也躋升也釋詁文

公羊傳曰躋者何升也禘祭之禮審諦昭穆諸廟已毀未毀之主皆於大祖廟中以昭穆為次序父為昭子為穆大祖東向昭南向穆北向孫從王父以次而下祭畢則復其廟其兄弟相代則昭穆同班近據春秋以來惠

公與莊公當同南面西上隱桓與閔僖亦同北面西上僖是閔之庶兄繼閔而立昭穆雖同位次閔下今升在閔上故書而譏之僖公以其三十三年十一月薨至此年十一月喪服始畢今始八月時未應吉禘而於大廟行之與閔公二年吉禘于莊公其違禮同也彼書吉禘其譏已明則此亦從譏可知不復更譏其速也徒猶空也空以逆祀之故亂國大典故特大其事謂之大事譏逆祀也釋例曰文公二年僖公之喪未終未應行吉禘之禮而於大廟行之其譏已明徒以躋僖而退閔故特大其事異其文定八年亦特書順祀皆所以起非常也

有事于武宮及順祀傳皆稱禘則知大事有事于大廟亦禘也

冬晉人宋人陳人鄭人伐秦注四人皆卿秦穆悔過終

用孟明故貶四國大夫以尊秦伯疏

正義曰四國大夫傳皆言名氏是四

人皆卿也秦穆悔過終用孟明仲尼特善其事無辭可
以寄文故貶四國大夫稱人所以尊崇秦德以諸侯之
名無所可加貶大夫以尊秦大夫非有罪也襄八年邢
丘之會晉悼霸功既就德立刑行貶諸侯之卿以尊晉
侯其事與此同也釋例曰秦伯終用孟明而致敗敗而
罪已赦其闕而養其志孟明增脩其德以霸西戎夫子
嘉之故於伐秦之役貶四國大夫四國大夫奉君命而
行今以一義變例故稱尊秦謂之崇德明罪不在四國
也大夫

公子遂如齊納幣注傳曰禮也僖公喪終此年十一月
則納幣在十二月也士昏六禮其一納采納徵始有玄
纁束帛諸侯則謂之納幣其禮與士禮不同盖公為大

子時已行昏禮也音義

纁許云反

疏

正義曰公羊傳曰此何以書識何識爾識喪娶

也娶在三年之外則何識乎喪娶三年之內不圖昏其
 意謂此喪服未畢而行昏禮也何休據此作膏肓以左
 氏為短今左氏傳謂之禮也必是喪服已終杜以長曆
 推之知僖公以其三十三年十一月薨至此年十一月
 喪已畢矣納幣雖則無月以傳言禮則知納在十二月
 也士昏六禮其一納采次有問名納吉至納徵始有玄
 纁束帛士謂之納徵諸侯則謂之納幣以其幣帛多其
 禮大與士禮不同故異其名也按士之昏禮納采問名
 同日行事納采者納其采擇之禮主人既許賓即問名
 將歸卜其吉凶也卜而得吉又遣使納吉如納采之禮
 納吉之後方始納徵徵成也使使納幣以成昏禮也此
 納幣以前已有三禮須再度遣使一月之內不容三遣
 適齊蓋公為大子時已行昏禮疑在僖公之世已行納
 采納吉今續而成之也杜言其一納采欲明納徵之前

更有昏禮納幣非昏禮之始豫為下句公為大子時已行昏禮張本也大子昏禮理自不書雖則公昏唯書納幣其納采納吉亦不書也釋例曰諸侯昏禮亡以士昏禮準之不得唯止於納幣逆女逆女納幣二事皆必使卿行卿行則書之他禮非卿則不書也宋公使華元來聘聘不應使卿故傳但言聘共姬也使公孫壽來納幣納幣應使卿故傳明言得禮也魯君之昏亦唯存納幣逆女此其義也

傳二年春秦孟明視帥師伐晉以報穀之役二月晉

侯禦之先且居將中軍趙衰佐之注代卻縠音義禦魚

呂反將子匠反衰初危反縠側巾反王官無地御戎注代梁弘狐鞫居

為右注鞫居續簡伯音義鞫九反甲子及秦師戰于彭

衙秦師敗績晉人謂秦拜賜之師注以孟明言三年

將拜君賜故嗤之音義

嗤尺之反

戰於殽也晉梁弘御戎

萊駒為右戰之明日晉襄公縛秦囚使萊駒以戈斬

之囚呼萊駒失戈狼暉取戈以斬囚禽之以從公乘

遂以為右箕之役注箕役在僖三十三年音義

呼火故反

暉尺甚反字林式

先軫黜之而立續簡伯疏

正義曰御與車

右雖有常員必臨戰更選定之韓之戰卜右慶鄭吉
是其事也自殽戰之後狼暉為右箕之役將戰選右
先軫黜之箕戰先軫死
焉非既戰乃黜之也
狼暉怒其友曰盍死之暉曰

吾未獲死所注未得可死處音義

蓋戶臘反
處昌慮反

其友曰

吾與女為難注欲共殺先軫音義

女音汝難
乃旦反

暉曰周

志有之勇則害上不登於明堂注周志周書也明堂

祖廟也所以策功序德故不義之士不得升死而不

義非勇也共用之謂勇注共用死國用音義

共音恭
注同

吾以勇求右無勇而黜亦其所也注言今死而不義

更成無勇宜見退謂上不我知黜而宜乃知我矣注

言今見黜而合宜則吾不得復言上不我知音義

復扶

又子姑待之疏

正義曰周之志記有之曰有勇以害在上則為不義之人不得升於明堂

若殺先軫則必死死而不義非勇也如以死共國家之用是之謂勇吾自以有勇之故求為車右若殺先軫則是無勇無勇而被黜退亦是得其所也吾復安得為恨吾今恨者謂在上不我知也言其不知我有勇也若殺先軫即是成為無勇無勇被黜退則黜而合其宜也乃是在上知我矣不得言在上不我知也子且待之注正義曰志者記也謂之周志明是周世之書不知其書何所名也鄭玄以為明堂在國之陽與祖廟別處左氏舊說及賈逵盧植蔡邕服虔等皆以祖廟與明堂為一故杜同之祭統云古者明君必賜爵祿於大廟傳稱公行還告廟舍爵策勲是明堂之中所以策功序德故不義之人不得升之也害上即是不義故不及彭衙既陳以其屬馳秦師死焉注得登明堂也

屬屬已兵音義

陳直
覲反

晉師從之大敗秦師君子為狼

暉於是乎君子詩曰君子如怒亂庶遄沮注詩小雅

言君子之怒必以止亂遄疾也沮止也音義

遄市專
反沮在

汝反又曰王赫斯怒爰整其旅注詩大雅言文王赫然

奮怒則整師旅以討亂音義

赫火
百反

怒不作亂而以從

師可謂君子矣○秦伯猶用孟明孟明增脩國政重

施於民趙成子言於諸大夫曰注成子趙衰音義

施式

政反秦師又至將必辟之懼而增德不可當也詩曰毋

念爾祖聿脩厥德注詩大雅言念其祖考則宜述脩

其德以顯之母念念也音義

辟音避母音無注同

孟明念之矣

念德不怠其可敵乎注為明年秦人伐晉傳○丁丑

作僖公主書不時也注過葬十月故曰不時倒在僖

三十三年疏

正義曰僖三十三年傳已發例言作主非禮此復云書不時者彼因葬緩遂通

譏作主之失未辯失之所由於此又言不時以明失禮之狀接成彼義也

○晉人以公不

朝來討公如晉夏四月己巳晉人使陽處父盟公以

恥之注使大夫盟公欲以恥辱魯也經書三月乙巳

經傳必有誤書曰及晉處父盟以厭之也注厭猶損

也晉以非禮盟公故文厭之以示譏音義

厭於涉反注同

適

晉不書諱之也注不書公如晉○公未至六月穆伯

會諸侯疏

正義曰沈云非公命不書此穆伯會諸侯公未至而書者此公既在外命正卿守國

故守國之臣亦合告廟而行故得書之也

及晉司空士穀盟于垂隴晉討

衛故也注討元年衛人伐晉士穀士為子音義

為于委反

書士穀堪其事也注晉司空非卿也以士穀能堪卿

事故書音義

書士穀或作書曰晉士穀

疏

正義曰傳舉司空之官云堪其事乃書之明本

不當書故知非卿也成二年傳稱魯賜晉三帥三命之服司空亞旅皆受一命之服是其知司空非卿之文陳侯為衛請成于晉執孔達以說注陳始與衛謀

謂可以強得免今晉不聽故更執孔達以苟免也音

義

偽為于反

○秋八月丁卯大事于大廟躋僖公逆祀也

注僖是閔兄不得為父子嘗為臣位應在下令居閔

上故曰逆祀音義

令力呈反閔上時掌反一本無上字

疏

正義曰禮父子異昭穆兄

弟昭穆同故僖閔不得為父子同為穆耳當閔在僖上今升僖先閔故云逆祀二公位次之逆非昭穆亂也魯語云將躋僖公宗有司曰非昭穆也弗忌曰我為宗伯明者為昭其次為穆何常之有如彼所言似

閔僖異昭穆者位次之逆如昭穆之亂假昭穆以言之非謂異昭穆也若兄弟相代即異昭穆設令兄弟四人皆立為君則祖父之廟即已從毀知其禮必不然故先儒無作此說於是夏父弗忌

為宗伯注宗伯掌宗廟昭穆之禮音義

夏戶雅反昭上遙反後昭

穆之例

疏

正義曰周禮大宗伯掌建邦之天神人鬼地祇之禮小宗伯掌建國之神位辯廟祧

之昭穆諸侯之官所掌亦當然也

尊僖公且明見曰吾見新鬼大故

鬼小注新鬼僖公既為兄死時年又長故鬼閔公死

時年少弗忌明言其所見音義

長丁丈反疏正義曰少詩照反且明見

者既尊崇僖公且明言其意之所見見其順大小升聖賢也劉炫以為直據兄弟大小為義不須云死之

張幼以規杜氏今刪定知不然者以傳云新鬼大故
鬼小則大小之語總該諸事非直獨據兄弟明知亦
據年先大後小順也躋聖賢明也注又以僖公為聖
時也

賢明順禮也君子以為失禮疏

正義曰傳有評論皆託之君子此下盡先

姑以來皆是一君子之辭耳引詩二文於詩之下各言君子者君子謂作詩之人此論事君子又引彼作詩君子以為證且僖公薨後始作魯頌為傳之時乃設此辭非當時君子有此言也弗忌之意以先大後小為順故言明順禮也君子之意以臣不先君為順故云禮無不順各言其順順不同也魯語展禽云夏父弗忌必有天殃其葬也焚煙達于禮無不順祀國土孔晁云已葬而柩焚煙達槨外

之大事也而逆之可謂禮乎子雖齊聖不先父食久

矣注齊肅也臣繼君猶子繼父音義

先悉薦反下不先皆同

故

禹不先蘇湯不先契注蘇禹父契湯十三世祖音義

蘇古本反契息列反殷始封之君

疏

正義曰蘇禹父夏本紀文也契湯十三世祖殷本紀文契生昭

明昭明生相土相土生昌若昌若生曹圉曹圉生冥冥生振振生微微生報丁報丁生報乙報乙生報丙報丙生主壬主壬生主癸主癸生天乙天乙即湯也下注云不窋后稷子周本紀文服虔云周家祖后稷以配天明不可先也故言不先不窋禹湯異代之王故言不先蘇契也然則文武大聖后稷賢耳非是不可先也下句引詩皇祖后稷不欲重文故舉不窋以辟之文武不先不窋注不窋

后稷子音義

窋知律反

宋祖帝乙鄭祖厲王猶上祖也注

帝乙微子父厲王鄭桓公父二國不以帝乙厲王不

肖而猶尊尚之音義

肖悉召反疏

正義曰帝乙微子父宋世家文厲王鄭桓公父

鄭世家文微子桓公宋鄭始祖也言宋祖帝乙鄭祖厲王則二國立其廟而祖祀之微子不先帝乙桓公不先厲王猶上祖也言不以不肖猶尊尚之也宋為王者之後得祀殷之先王帝乙之廟不毀者蓋以為其所出故特存焉周制王子有功德出封者得廟祀所出之王魯以周公之故得立文王之廟襄十二年傳稱魯為諸姬臨於周廟周廟文王廟也鄭之桓武世有大功故得立厲王之廟昭十八年傳稱鄭人救火使祝史徙王祏於周廟周廟厲王廟也是以魯頌曰春秋匪解享祀不

忒皇皇后帝皇祖后稷注忒差也皇皇美也后帝天

也詩頌僖公郊祭上天配以后稷音義

解戶買反武他得反差二

也

疏正義曰魯頌閟宮之篇美僖公之德也上皇皇

為美下皇為君言僖公春秋祭祀非有懈倦其所享祀不有差忒所祀之神有皇皇之美者為君之上天配之以君祖后稷也

君子曰禮謂

其后稷親而先帝也注先稱帝也詩曰問我諸姑遂

及伯姊注詩邶風也衛女思歸而不得故願致問於

姑姊音義

北音佩

君子曰禮謂其姊親而先姑也注僖

親文公父夏父弗忌欲阿時君先其所親故傳以此

二詩深責其意仲尼曰臧文仲其不仁者三不知者

三下展禽注展禽柳下惠也文仲知柳下惠之賢而

使在下位非已欲立而立人之道音義不知音廢六

關注塞關陽關之屬凡六關所以禁絕末遊而廢之

音義

塞悉再反

妾織蒲三不仁也注家人販席言其與民

爭利音義

販甫萬反

作虛器注謂居蔡山節藻稅也有其

器而無其位故曰虛音義

稅章悅反

縱逆祀注聽夏父躋

僖公祀爰居三不知也注海鳥曰爰居止於魯東門

外文仲以為神命國人祀之音義

爰居爾雅一名雞縣樊光云似鳳凰

爰居事見國語莊子云
魯侯御而觴之于廟

疏

正義曰魯臣多矣而獨譏
文仲者以文仲執國之政

有大知之名為不知之事故特譏之其餘則不足責
矣論語稱仁者愛人知者不惑故以害於物者為不
仁闡於事者為不知卑下展禽而不肯舉薦廢去六
闕而不設防禁妾織蒲席而與民爭利此三事為不
仁也無其位而作虛器不知禮而縱逆祀不識烏而
祀爰居此三事為不知也注正義曰論語云臧文仲
其竊位者與知抑下惠之賢而不與立也又曰仁者
已欲立而立人知賢不舉是無恕心故為不仁也昭
五年傳稱孟丙仲壬之子殺豎牛於塞闕之外襄十
七年傳稱師自陽闕逆臧孫二闕見於傳如此之屬
凡有六也民以田農為本商賈為末農民力以自食
商民遊以求食漢書賈誼說上曰今毆民而歸之農
皆著其本各食其力末技遊食之民轉而緣南畝則
畜積足矣杜稱末遊者謂此末技遊食之民也周禮

司闕司貨賄之出入掌其治禁是所以禁絕末遊者
令其出入有度今而廢之使末遊之人無所禁約損
害農民是不仁也家語說此事作妾織席知織蒲是
為席以販賣之大學云食祿之家不與民爭利故
以此為不仁也論語云子曰臧文仲居蔡山節藻稅
何如其知也鄭玄云節桷也刻之為山稅梁上楹也
畫以藻文蔡謂國君之守龜山節藻稅天子之廟飾
皆非文仲所當有之有其器而無其位故曰虛君子
下不僭上其居奢如此是不知也魯語云海鳥曰爰
居止於魯東門之外三日臧文仲命國人祭之展禽
曰越哉臧孫之為政也夫祀國之大節也節政之所
成也故制祭祀以為國典今無故而加典非政之宜
也今海鳥至已不知而祀之以為國典難以言仁曰
知矣無功而祀之非仁也弗知而不問非知也今茲
海其有災乎夫廣川之鳥獸皆○冬晉先且居宋公
知辟其災是歲海多大風冬暖

子成陳轅選鄭公子歸生伐秦取汪及彭衙而還以報彭衙之役卿不書為穆公故尊秦也謂之崇德音

義

成音城本或作戌音恤選息
克反汪烏黃反為于偽反

○襄仲如齊納幣禮

也凡君即位好舅甥脩昏姻娶元妃以奉烝盛孝也
注謂諒闇既終嘉好之事通于外內外內之禮始備
此除凶之即位也於是遣卿申好舅甥之國脩禮以
昏姻也元妃嫡夫人奉烝盛共祭祀音義

好呼報反
注同娶七

住反妃芳菲反烝音姿盛
音成嫡丁歷反共音恭

孝禮之始也

經三年春王正月叔孫得臣會晉人宋人陳人衛人鄭人伐沈沈潰注傳例曰民逃其上曰潰沈國名也汝南

平輿縣北有沈亭音義

沈尸甚反潰戶內反輿音餘一音預

夏五月王子虎卒注不書爵者天王赴也翟泉之盟雖

輒假王命周王因以同盟之例為赴音義

為于偽反又如字本或作

來疏正義曰王子虎即王叔文公也諡之為文必當有赴爵不書爵者畿內之國不得外交諸侯其臣不敢

赴魯必天子為之赴赴以王子為親不復言其爵也翟泉之盟子虎在列而貶之稱人若王使來盟不應貶責

不假王命則不得與盟故知於時輒假王命周王遂以同盟之禮為之赴魯傳稱來赴弔如同盟禮也是其來

赴往弔皆如
同盟之禮

秦人伐晉注晉人恥不出以微者告

秋楚人圍江

雨螽于宋注自上而隋有似於雨宋人以其死為得天

祐而來告故書音義

雨于付反注及傳同螽音終
隋徒大反傳注同祐音又

冬公如晉十有二月己巳公及晉侯盟

晉陽處父帥師伐楚以救江

傳三年春莊叔會諸侯之師伐沈以其服於楚也沈

潰凡民逃其上曰潰在上曰逃注潰衆散流移若積

水之潰自壞之象也國君輕走羣臣不知其謀與匹

夫逃竄無異是以在衆曰潰在上曰逃各以類言之

音義

輕如字又遣政反竄七亂反

疏

正義曰公羊傳曰潰者何下叛上也國曰潰邑曰叛釋例

曰衆保於城城保於德言上能以德附衆以功庇下民信其德恃其固故能交相依懷以衛社稷苟無固志盈城之衆一朝而散如積水之敗故曰潰潰者衆散流遁之辭也國君而逃師棄盟違其典儀棄其車服羣臣不知其謀社稷不保其安此與匹夫逃竄無異是以在衆為潰在君為逃以別上下之名無取於別國邑也賈穎以為舉國曰潰一邑曰叛按左氏無此義也傳曰陳侯如楚慶氏以陳叛此則舉國不必

言潰也叛者舉城而屬他非民潰之謂也是解潰逃之義也僖五年首止之盟鄭伯逃歸襄七年鄒之會陳侯逃歸皆書於經十年傳厥貉之會麋子逃歸不書者於時楚會諸侯魯不與楚不告故不書也襄十六年溴梁之會傳稱高厚逃歸不書於經者釋例云例之潰逃指為一國一軍一邑居民相須為用變文以別之也鄭詹見囚於齊自齊逃來此為逸囚無下可逃春秋指事而書所謂民逃非在上之逃也而賈氏復申以入例亦不安也如例所言高厚之逃縱有師衆止同逸囚之限非是逃例然鄭詹書而高厚不書者鄭詹為逃來向魯故

○衛侯如陳拜晉成也注

二年陳侯為衛請成于晉音義

為于偽反

○夏四月乙亥

王叔文公卒來赴弔如同盟禮也注王子虎與僖公

同盟於翟泉文公是同盟之子故赴以名傳因王子

虎異於諸侯王叔又未與文公盟故於此顯示體例

也經書五月又不書日從赴也疏

正義曰隱七年傳例曰凡諸侯同盟

於是稱名故薨則赴以名者指謂同盟之二君耳不言與其父盟得以名赴其子但同盟稱名則兩君相知君既知之則國內皆知故彼父雖卒得以名赴其子此理雖爾凡例未明王子虎與僖同盟文公是其同盟之子今乃以名赴文是其於禮合赴此類多矣傳因王子虎天子之臣異於諸侯王叔又未與文公同盟故於此顯示體例則其餘從可知也○秦伯伐晉濟河焚舟注示必

死也取王官及郊注王官郊晉地晉人不出遂自茅

津濟封穀尸而還注茅津在河東大陽縣西封埋藏

之音義

大音泰

遂霸西戎用孟明也君子是以知秦穆

公之為君也舉人之周也注周備也不偏以一惡棄

其善與人之壹也注壹無貳心孟明之臣也其不解

也能懼思也子桑之忠也其知人也能舉善也注子

桑公孫枝舉孟明者音義

解佳買反下同

詩曰予以采繁于

沼于汴予以用之公侯之事秦穆有焉注詩國風言

沼汴之繁至薄猶采以共公侯以喻秦穆不遺小善

音義

繁音煩沼之紹反
訛音止共音恭

夙夜匪解以事一人孟明有

焉注詩大雅美仲山甫也一人天子也詒厥孫謀以

燕翼子子桑有焉注詒遺也燕安也翼成也詩大雅

美武王能遺其子孫善謀以安成子孫言子桑有善

舉之謀音義

詒以之反疏正義曰詒遺釋詁文燕之
遺唯季反為安常訓也翼者贊成之

義故為成也詩大雅文王有聲之
篇美武王之事言子桑有此義也

○秋雨螽于宋隊

而死也注螽飛至宋隊地而死若雨音義

隊直類反

○楚

師圍江晉先僕伐楚以救江注晉救江在雨螽下故

使圍江之經隨在雨螽下疏

正義曰先僕救江經無其事但實在雨螽之後

不進救江於前而退圍江於下欲令下與處父救江相接故也

○冬晉以江故告于

周注欲假天子之威以伐楚王叔桓公晉陽處父伐

楚以救江注桓公周卿士王叔文公之子桓公不書

示威名不親伐疏

正義曰王叔文公不知何王之子字叔遂以叔為氏桓公是其子王

叔陳生是其後也衛有公叔文子此人蓋以王叔為氏也

門于方城遇息公子朱

而還注子朱楚大夫伐江之帥也聞晉師起而江兵

解故晉亦還音義

帥所類反解音蟹又佳買反

○晉人懼其無禮

於公也請改盟注改二年處父之盟公如晉及晉侯

盟晉侯饗公賦菁菁者莪注菁菁者莪詩小雅取其

既見君子樂且有儀音義

菁子丁反莪五多反樂音洛下文何樂小國之樂同

莊叔以公降拜注謝其以公比君子也曰小國受命

於大國敢不慎儀君貺之以大禮何樂如之抑小國

之樂大國之惠也晉侯降辭注降階辭讓公登成拜

注俱還上成拜禮音義

上時掌反又如字

疏

正義曰燕禮賓降階再拜稽首

公命小臣辭賓升成拜鄭玄云升成拜復再拜稽首也先時君辭之於禮若未成然此莊叔以公降拜晉

侯降辭禮未成故更登成拜是賓主俱還上成拜禮也

公賦嘉樂注嘉樂詩大

雅義取其顯顯令德宜民宜人受祿于天音義

嘉戶嫁反

樂如字

注同

經四年春公至自晉注無傳

夏逆婦姜于齊注稱婦有姑之辭疏

正義曰桓三年齊侯送姜氏于謹注

云已去齊國故不言女未至於魯故不稱夫人然則往逆當稱逆女入國當稱夫人此時逆則卿不行入復不告至其禮輕畧異於常文徒以有姑故稱婦以齊女則稱姜直云逆婦姜于齊畧賤之文也

狄侵齊注無傳

秋楚人滅江注滅例在文十五年疏

正義曰案莊十年齊師滅譚注云滅

例在文十五年滅弦滅黃滅夔皆不注獨更於此言者沈氏云滅譚為入春秋之初故須指其例弦黃夔等傳皆載其見滅所由今滅江傳無事跡恐異於餘滅故更引滅例云在十五年

晉侯伐秦

衛侯使甯俞來聘音義

俞羊朱反

冬十有一月壬寅夫人風氏薨注僖公母風姓也赴同

祔姑故稱夫人音義

附音

疏

正義曰杜言此者以成風本是莊公之妾嫌其不成

夫人故明之也釋例曰凡妾子為君其母猶為夫人雖先君不命其母母以子貴其適夫人薨則尊得加於臣

子內外之禮皆如夫人矣故妣氏之喪責以小君不成
成風之喪王使會葬傳曰禮也是言適夫人既死妾母
於法得成
夫人也

傳四年春晉人歸孔達于衛以為衛之良也故免之
注二年衛執孔達以說晉○夏衛侯如晉拜注謝歸
孔達曹伯如晉會正注會受貢賦之政也傳言襄公
能繼文之業而諸侯服從○逆婦姜于齊卿不行非
禮也注禮諸侯有故則使卿逆君子是以知出姜之
不允於魯也注允信也始來不見尊貴故終不為國

人所敬信也文公薨而見出故曰出姜曰貴聘而賤
逆之注公子遂納幣是貴聘也君而卑之立而廢之
注君小君也不以夫人禮迎是卑廢之棄信而壞其
主在國必亂在家必亡注主內主也音義壞音怪不允

宜哉詩曰畏天之威于時保之敬主之謂也注詩頌

言畏天威於是保福祿○秋晉侯伐秦圍祁新城以

報王官之役注祁新城秦邑也王官役在前年音義

祁願晚反
一音元

○楚人滅江秦伯為之降服出次不舉過

數注降服素服也出次辟正寢不舉去盛饌鄰國之

禮有數今秦伯過之音義

為于偽反下文注為賦為歌皆同去起呂反饌仕眷

反疏

正義曰僖三十三年傳曰秦伯素服郊次意與此同知此降服為素服也出次出於宮而別次

舍故云辟正寢也殺牲盛饌曰舉知不舉去盛饌也鄰國之禮有數不知其數幾何以言過數知其必有數耳哀十年傳稱齊人弒悼公赴于師吳子三日哭于軍門之外鄰國之數蓋三日也大夫諫

公曰同盟滅雖不能救敢不矜乎吾自懼也注秦江

同盟不告故不書音義

矜居陵反

君子曰詩云惟彼二國

其政不獲惟此四國爰究爰度其秦穆之謂矣注詩

大雅言夏商之君政不得人心故四方諸侯皆懼而謀度其政事也言秦穆亦能感江之滅懼而思政爰於也究度皆謀也音義究音救度待洛反注同疏正義曰徧檢諸本君子曰下皆無詩云則傳文本自畧也詩意言維彼夏商二國其政不得民心致使國家喪滅維此四方之國見其亡滅於是自謀於是自度其政事自懼已之滅亡也此詩所言其秦穆之謂也此詩大雅皇矣一篇

○衛甯武子來聘公與之宴為賦湛露及彤弓注非

禮之常公特命樂人以示意故言為賦湛露彤弓詩

小雅音義

湛直減反彤徒冬反

疏

正義曰諸自賦詩以表已志者斷章以取義意不限詩之

尊卑若使工人作樂則有常禮穆叔所云肆夏樊遏
渠天子所以享元侯也文王大明縣則兩君相見之
樂也燕禮者諸侯燕其羣臣及燕聘問之賓禮也歌
鹿鳴四牡皇皇者華如彼所云蓋尊卑之常禮也自
賦者或全取一篇或止歌一章未有頓賦兩篇者也
其使工人歌樂各以三篇為斷此其所以異也此時
武子來聘魯公燕之於法當賦鹿鳴之三今賦湛露
彤弓非是禮之常法傳特云為賦知公特命樂人歌
此二篇以示意也此二篇天子燕諸侯之詩公非天
子賓非諸侯不知歌此欲示何意蓋以武子有令名
歌此疑是試之耳不辭又不荅賦使行人私焉注私問之對

曰臣以為肄業及之也注肄習也魯人失所賦甯武

子佯不知此其愚不可及音義

肄字又作肆以二反
注同佯音陽一音祥

疏

正義曰說文肆訓為陳字從長聿聲肆訓為習字從聿希聲古書經傳所作字皆同耳臣以為工人

自習詩業以及此篇非謂歌之以為已也魯人失於所賦辭則章主之失答則已當其寵故不辭又不答佯若不知其所為如愚人然論語云甯武子其知可及其愚不可及此亦是愚之一事也按燕禮無答賦之法而怪其不答賦者非常之賦宜有對答故也

昔諸侯朝正於王注朝而

受政教也王宴樂之於是乎賦湛露則天子當陽疏

正義曰湛露詩云湛湛露斯匪陽不晞陽謂日也言天子當日諸侯當露也

諸侯用命也

注湛露曰湛湛露斯匪陽不晞晞乾也言露見日而

乾猶諸侯稟天子命而行音義

樂音洛下注宴樂同晞音希

諸侯

敵王所愾而獻其功注敵猶當也愾恨怒也音義

愾苦

愛疏

正義曰敵者相當之言愾是恨怒之意當王所反怒謂往征伐之勝而獻其功也彤弓序云天子

賜有功諸侯也

王於是乎賜之彤弓一彤矢百玃弓矢千以

覺報宴注覺明也謂諸侯有四夷之功王賜之弓矢

又為歌彤弓以明報功宴樂音義

玃音盧

疏

正義曰

知之意故為明也使諸侯明已心也莊三十一年傳

曰諸侯有四夷之功則獻于王中國則否禮諸侯賜

弓矢然後專征伐故有功則賜之以弓矢又歌此彤

弓之詩以明天子之心知是報功宴樂也詩言一朝

饗之則是為設饗禮此云宴者今陪臣來繼舊好注

明其為宴樂耳非言設宴禮也

方論天子之樂故自稱陪臣音義

好呼報反

君辱眚之其

敢干大禮以自取戾注眚賜也干犯也戾罪也音義

眚音況戾力計反

○冬成風薨注為明年王使含賵傳

春秋左傳注疏卷十七

春秋左氏傳注疏卷十七考證

天王使毛伯來錫公命疏或是世事王朝○臣浩按文

義當作世仕王朝

傳於是閏三月非禮也注於歷法閏當在僖公末年誤
于今年三月置閏○顧炎武日知錄曰古人以閏為
歲之餘凡置閏必在十二月之後故曰歸餘於終考
經文之書閏月者皆在歲末文公六年閏月不告朔
哀公五年閏月葬齊景公是也而左傳成公十七年

襄公九年哀公十五年皆有閏月亦並在歲末又經傳之文凡閏不言其月者言閏即歲之終可知也今魯改歷法置閏在三月故為非禮臣照按閏必歲終則四時多舛事之昔非今是者惟歷法最為顯然蓋天地亦以漸而開推步之密魯實始基之矣孔子紀魯始閏三月其譏與否固無明文左氏則以非周制而謂為非禮

傳先王之正時也一節○臣召南按律歷志曰經于四

時雖亡事必書時月時所以紀啟閉也月所以紀分至也啟閉者節也分至者中也節不必在其月中必在正數之月按此解舉正于中甚精又按王應麟困學紀聞曰素問立端於始表正於中推餘於終而天度畢矣注謂立首氣於初節之日示斗建於月半之辰退餘閏於相望之後可以發明左氏正時之義

傳穆伯如齊始聘焉禮也○劉敞曰左氏見當時諸侯廢喪而聘故推以為禮杜氏見左氏有得禮之言遂

推以當喪而吉皆反經越禮不可以教後世

八月丁卯大事于大廟躋僖公注大事禘也○萬斯大曰天子四時之祭春祫夏禘秋嘗冬烝四祭中惟禘最大故嘗烝曰有事禘曰大事

又疏躋升也釋詁云○

臣浩

按疏例當作釋詁文

傳狐鞠居為右注鞠居續簡伯○

臣召南

按杜所以知

鞠居即續簡伯者以六年傳賈季使續鞠居殺陽處父鞠居即狐氏之族也

傳書曰及晉處父盟以厭之也○趙汭補注曰傳釋處父去族

傳先大後小注又以僖公為聖賢○臣召南按魯人甚

重僖公魯頌之文鋪張揚厲贊不容口宜乎夏父弗忌之以為聖賢也

傳故禹不先鯀湯不先契疏昭明生相土○昭監本訛作相今改正

傳宋祖帝乙鄭祖厲王猶上祖也注二國不以帝乙厲

王不肖而猶尊尚之○

臣浩

按帝乙未見有不肖之

事以與周厲並稱注順文為說耳

臣照

按易屢稱帝

乙歸妹先儒以帝乙為成湯此帝乙當亦是成湯蓋

武王封微子以奉湯祀宋自當以湯為祖鄭則出自

厲自當以厲為祖傳蓋言宋祖湯鄭祖厲豈繫賢否

但尚祖耳子孫不得臧否祖宗也于文不必帝乙厲

王皆不肖乃可通自有杜注而後世并以疑易

傳仲尼曰注非已欲立而立人之道○監本脫非字脫

之道二字今添

傳廢六闕○王應麟困學紀聞曰家語作置六闕注謂
文仲置闕以稅行者故為不仁

傳襄仲如齊納幣禮也○萬斯大曰昏禮有六納幣之
先已有納采問名納吉三禮縱納幣在十二月其未
祥而納采問名未禪而納吉斷可知矣安得謂非喪
娶乎

王子虎卒○林堯叟曰王卿不卒惟王子虎劉卷書

傳王叔文公卒○趙汭補注曰傳言同盟指當時諸侯會盟而言王子虎踐土翟泉實盟諸侯故赴弔用諸侯同盟例

傳今陪臣來繼舊好○林堯叟曰此尊天子之辭非稱陪臣于魯也臣照按甯武子自稱陪臣言已固周室之陪臣不言魯之非天子而言已之實陪臣善辭也

春秋左氏傳注疏卷十七考證

謹按卷十六第七頁前五行疏楚伐鄭師于汜刊
本監本毛本伐訛戍據宋本改

第七頁前六行疏尋討傳文諸本文訛云據宋本
改

第八頁前八行注肆由也諸本由訛申據宋本改
第十一頁後六行疏因郊祀天而望祭之諸本祀
訛祭據宋本改

第十三頁前七八行疏不可改名為牲諸本不可

改名訛得吉日不四字據宋本改

第二十頁後四行疏左右皆下諸本下訛不今據
宋本改

第三十一頁前三行疏卜日而後行事諸本卜訛十
據宋本改

卷十七第八頁前五行疏所以相保恃也諸本恃
訛時據宋本改

第十四頁後六行疏主人既許諸本許訛諾據宋

本改

第十五頁前四行疏魯君之昏諸本脫魯字據宋

本增

第二十二頁後三行疏節柄也諸本柄訛揣據宋

本改

第二十七頁前二行疏欲令下與處父救江相接

諸本下訛不據宋本改

第二十八頁前一行疏晉侯降辭諸本降辭訛辭

之據宋本改

前七行疏畧賤之文也諸本畧訛上據宋本改
第三十一頁後一行疏肆諸本訛隸據宋本改



覆校官編修臣張秉愚

校對官修撰臣張書勲

謄錄監生臣宋鐸

謄錄監生臣王應璧